

# 1 Kolin

## **Pâlaŋ Kolin am ekŋengat zapat meluwaŋ ŋeŋaŋ kapi kumindaye**

Zapat meluwaŋ kapi Pâlaŋ Kolin ekŋengat ŋeŋaŋ kumindaye. Kolin ekŋengat zapat meluwaŋ zut kuye yangut nukŋaŋ sepem ikŋak ikŋakgapmti sek zut kuye. Pâlaŋ Kolin mkaen Kawawaŋgalen Zet Zapat Dolakŋaŋ Penaj timepme sek zut beye kan keyet Kolin dampelaŋge msokbemindemti koge. Koti mame nukŋaŋ notnaŋ sokbeme kot zeme nâmtiyepm zapat meluwaŋ kapi kuye.

Kolin mka temaŋ ke Akaia plowis keŋaŋ tazin. Manan Akaia msat ke msat temaŋ alak pigokgat Glis makup keyet keŋaŋ tazin. Am msat keyetnaŋaŋ zelin Glik zet ke manzeip. Kolin mka keyaŋ nembu ganzenan ma msat busiliŋaŋ ŋetekŋaŋ Aika msat temaŋ ma Kolin mka temaŋgatnaŋ mezinen ke atam tatatnaŋnok mam tazin. Âpme am waŋgaen makotemien ekŋenaŋ tokwat bembululungat wisat mti sakwep mepmegalen nâmti waŋgaŋjin Kolin msat busiliŋanen ke gapumoti nembet daen mebemti moti mametemien. Mme naman Kolin ke kawa kambuk ikŋakŋen tapme keŋanen amnaŋ sesewat mulup sepem ikŋak ikŋak mamtemien. Kawa kambuk ŋengat keŋan Kawawaŋ sesewatsawien ma ŋengat keŋan nopiom mânep milawatgalen mene sesewatsawien ma kawa kambuk ŋengat nopiom imbi set kileŋgalen. Kogok mme Kolin

mka ke mama mimi mgasikgalen sulumsesik-  
gañ Kolin am indabulut tapmeyepm Pâlañ zapat  
meluwañ kapi kumindaye. Nukñañ notnañ Kolin  
mkaen dapmelañge mambien ekñenmagen sok-  
beyeen kapigok: Ekñenañ meu nopiom ekñengat  
sâpe sâpe zemindamti naman timkot bemkwiti  
kwiti munduman kobeme dapmelañge ekñengat  
tuñguwinanen notnaññañ ke met kwitim nime  
zezet bañbaññañmak sokbeye. Notnaññañ noli-  
nañgalen mama mimiyet ektekalili mulup omba  
mbien. Nolin towewenañ ekñengat tewalañ be-  
mbeyet nâmti kumindaye (7:1; 8:1; 12:1; 16:1).

**Zet ñotekñañ temañ kapigogañ 1 Kolin zapat  
meluwañ keñañ talip:**

1:1-9 Pâlañ indamukumti zemgwatnañ zet not-  
nañ zeye

1:10-4:21 Zet atindândâ yañ dapmelañge  
kalañge

5:1-6:20 Msatgalen mama mimi bekañaññañ  
dapmelañge ekñengalen nâmkijpepenjin  
waletme delañ zemâge

7:1-40 Pâlañ awimbiñ mamayet zet notnañ zeye

8:1-11:1 Keñ zut palen ku mamayelen; Zisas  
kwewetañ nâmkijpemti mamayelen

11:2-14:40 Dapmelañge ñoktik sepem zibon  
mâti Kawawañ sesewatpepeyelen

15:1-58 Zisasiyañ gakikiyeengatnañ  
wageyepmti am nâmkijpepenjinmagañ  
kegogak wabep

16:1-24 Pâlañ ikñañgat zigok mimiyelen  
nâñgeyet zemkawañ bemti zemgwatnañ  
mindamti eksem mamayet zemindeye

<sup>1</sup> Pâl neŋ Kawawaŋaŋ ikŋaŋ nânganok Zisas Kilaisiyaŋ buŋam zapaŋtaŋ zempalakŋaŋ bembeyelen annaŋ nakumtetiye ma ningat notn nâmkijpepeŋaŋmak kwitnaŋ Sosenes <sup>2</sup> nit meluwaŋ kapi kumti Kawawaŋgalen am nâmkijpepeŋinmak Kolin mka teman mamaip ingat kumbemalu kozin. Kawawaŋaŋ in Zisas Kilaismak tsumindemti mme teŋ kwapme iknaŋgat zapaŋtaŋ mamayet indakumtetiye. Kawawaŋgalen Zet Zapaŋtaŋ Dolakŋaŋ Penajaŋ keyaŋ am sambe msat kataŋ Amobotnaŋaŋ Zisas Kilais masesewatpeip ekŋenmagen penajaŋ bein ma egaŋ ekŋengalen Amobotnaŋin ma sakam kegoŋgak ningalen Amobotnaŋaŋ bein.

<sup>3</sup> Bipm Kawawaŋaŋ ma Amobotnaŋ Zisas Kilais egetmagengataŋ keŋ taolet ma keŋ sewakŋaŋ inmagen wemti weweyelen mandundulup.

*Kolin am ekŋenmagen zet zapaŋtaŋ dolakŋaŋgalen penajaŋ sokbeye*

<sup>4</sup> Kawawaŋaŋ in Zisas Kilais nâmkijpeme keyepmti egat pembenagaŋtaŋ keŋ taolet omba mamimindain. Neŋ Kawawaŋgalen keŋ taoletgat ma kwitnaŋ kwitnaŋ kapiyet egat kan kataŋ wisikŋ zemti mandundayap. <sup>5</sup> Enenogat in Zisas-iyelengapmti Kawawaŋaŋ kwitnaŋ kwitnaŋ sambe in tim mamayelen indaye ke kapigok: in nânâ penajaŋ keyelen yaŋaŋ kogogak winde indame nâmbien ma Kawawaŋgalen zet katnaŋ penajaŋ ke amgat diindondoyet winde ŋep indayeyaŋ tat indain. <sup>6</sup> Ke Kilaisiyet buŋam zapaŋtaŋ ingat tuŋguwinan zemkawaŋaŋ bemann keŋinaŋ atam katik mbien. <sup>7</sup> Keyepmti in Kawawaŋgalen

Emetak Tenan taolet yanar yanar maindai kwep nen ku matimalip timti in Amobotnanan Zisas Kilais bamgat sokbembawan beme eegalen gulak damun mamip. <sup>8</sup> Ma Kilaisiyan in kegogak bandim mimindeme tej mama tapmepme kan delan zenze sokbeween Amobotnanan Zisas Kilaisiyelen kokot kanen ingat myungungunin nen ku aikbe. <sup>9</sup> Kawawanan Amobotnanan Zisas Kilais ekmak pepep bemti mamayet namti indakumte-time kobien. Ek zet nen zem nen zem ku mamin.

*Kolin dapmelange eknenan kalalan mbien*

<sup>10</sup> Kilaismagen notnne, ne nan Amobotnanan Zisas Kilaisiyet kwitnan gapmti in golan zet diindoma nat. In zet mmot mtot mti tunguwinan kalalan teman ku sokbak. In ken kwep bemti kalalanin tazin ke weyanme kwep bak. Mne keninan ma nananinan tusumti ken kwep mamayelen nawep. <sup>11</sup> Kilaismagen notnne, ingalen tunguwinan atindandâ teman tasokbein keyet zapalin ke Koloweyelen sip kwep notnanan kot dinome namban. <sup>12</sup> Zet zapalin kapigok kot zeme namban. Inmagen notnanan manzeip, “Nin Pâl egalen am.” Ma notnanan manzeip, “Nin Apolosiyele am.” Ma notnanan, “Nin Kepasiyele\* am,” manzeip. Ma notnanan, “Nin Kilaisiyelen am,” manzeip. <sup>13</sup> Kegok newangut pigok nen zenzeyelen Kilaisiyan iknan epeemti sambe ku beye. Ma Pâl nen ingapmti tewen yomengatnan indatitiyelele ku gakiwan. Ma Pâl nalen kwilen tusumindemti tu ku zulutindewien.

---

\* **1:12:** Kapi Pitayet kwitnan nen gilik zeleset makuip.

14 Neŋ inmagengatnaŋ am sambe tu ku zulutindewan yek. Keyet neŋ nâma ŋep bein. An zut Kilipusmak Gaias eget etaŋ zulutidewan. 15 Keyepmti inmagengatnaŋ ŋenaŋ, “Pâlgat kwitnanen tu zulutgeyap,” ŋep ku zenzeyelen. Egaŋ kegogak, “Neŋ egalen zapat,” ŋep ku zenak. 16 Neŋ Stiwen ma an notnaŋ egalen mkaen matalip ekŋen tu zulutindewan ke nâmtalap. Yaŋgut am notnaŋ tu zulutindewan ma yek ke ku nâmâtâtindeyap 17 enenogat neŋ Kilaisiyaŋ am tu zulutindendeyet ku zemenŋe. Egaŋ Kawawaŋgalen Zet Zapat Dolakŋaŋ Penaj zemkawaŋbembeyelen mulup ke naŋge. Yaŋ neŋ am nânâŋin temaŋ ekŋenaŋ manzeip kegok am ku maapitilimindeyap. Neŋ belak Kilais tewen kumasasokpewien zapat ke amnaŋ nâmkiŋpepeyelen mandiindoyap enenogat zet zapat ke ikŋaŋgat windenaŋ omba penaj tasain.

*Kawawaŋgaŋ amgat set maweyaŋzin ke ŋoktik dolakŋaŋ penaj*

18 Am waleletgalen mama mimi tapmip ekŋenaŋ Zisasiyet gakikiŋaŋgat buŋam zapat diindomann ekŋenaŋ nâme belakŋaŋ penaj mambein. Yaŋgut am yomengatnaŋ indatetiŋaŋ ekŋengat buŋam zapat ke diindoman kemageset keŋinan Kawawaŋgaŋ ekŋenmagen mulupmaŋ windenaŋbeŋ mamm. 19 Kawawaŋgalen Zet Itnaŋaŋ meluwaŋ ŋen pigok mimiŋaŋ tazin,

“Neŋ am ŋoktikŋin temaŋ ekŋengalen nânâŋin mtot indewap. Ma am ŋoktik sambe ma

otnâip ekñen ñoktikñin penj pema mebe.”  
*(Aizaya 29:14)*

<sup>20</sup> Mti amnañ nâme ñoktik temañ mambein ke Kawawañañ mapenpeme mezin. Kelak egañ am nânâ omba manâip ekñengalen nânâ ke ku matimti zein. Egañ, “Am Zuda ekñengalen zii zet nânup,” manzeip ekñengalen nânâ ke ku matimti zein. Egañ am zelañ auuyelen weyañti manzeip ekñengalen zet ke mapemewen.

<sup>21</sup> In nâit, am Kawawañgale Zet Zapat Dolakñañ Penañ ku manâmkinpeip ekñenañ Kawawañgale ñoktik temañ penañ ke nâme zet kilom mambein. Mme ekñenañ ilinañgat ñoktikñinañgat Kawawañ ku nâmâtâtpewien. Yanğut Kawawañañ am Kilais nâmkinpewien ekñen ombemindemti yomengatnañ indatitiyet egale Zet Zapat Dolakñañ Penaneset nin manzemkawañ benup keyañ am Kawawañgat zapat maañgalañindein. <sup>22</sup> Zuda am ekñenañ menok yañañ yañañ eegale ñoktikñin temañ keeset bemti matalip. Ma am Zuda mañgeengatnañ ku sokbembenañ ekñenañ nânâ temañmak mamayet ñoktikñin keeset mambeip. <sup>23</sup> Yanğut nin Zisas tewen kukuñañ keyet zapatnañ manzemkawañ benup. Mme Zuda am ekñenañ Kilais tewen gakiye keyet zapatnañ nânâyet ñenzinziñ mamip ma am Zuda mañgeen ku sokbembenañ ekñenañ nâme zet ke kilom mambein. <sup>24</sup> Yanğut Kawawañañ Zuda am notnañ ma am Zuda mañgeen ku sokbembenañ notnañ ikuñgat zapat bembeyelen indamandaye ekñenañ Kilaisiyelen

buŋam zapat zemkawaŋ beme nâmti ekŋenaŋ Kawawaŋgalen windenaŋ am yominangatnaŋ matimkwatindein ke maegip ma nânânaŋ temaŋ am walelelen ku mebegalen manâin ke kegogak maegip. <sup>25</sup> Am ekŋenaŋ Kawawaŋgalen zet keyet kilom zeme keyaŋ naman egalen nânâyaŋ amgalen nânâ masebempein. Ma Kawawaŋgat an windenaŋ isikŋaŋ bugan nâme keyaŋ naman egalen windeyaŋ amgalen winde masebempein.

<sup>26</sup> Ke neŋ pigok nâyapgat zema nâit: Kilaismagen notnne, in ewe ikŋaŋgat zapat ku indakum tetiyeen baen kan keyet in sambe notnaŋ nânâmak ku mambien ma notnaŋaŋ kogogak windemak ku tabien ma notnaŋ kwizet buŋammak ku mambien. <sup>27</sup> Am msat palengatnaŋaŋ anŋine ŋoktik temaŋinmak maombem indeip yaŋgut Kawawaŋaŋ am ŋoktikŋin temaŋmagaŋ sakambuk mimiyelen nâmti keyepm am tototnaŋ penaŋ ke ikŋaŋgalen mulup mimiyelen maonzemendein. Ma am windenjinmak ekŋenaŋ sakambuk mimiyelen nâmti keyepm am ekŋen windenjinpiŋ mamaip ke Kawawaŋaŋ maonzemendein. <sup>28</sup> Mme Kawawaŋ ŋep kwitnaŋ kwitnaŋ sambe am msat kapiyetnaŋaŋ nâme mobotnaŋ mambein ke asesekgalen manâin keyepm egaŋ am tototnaŋ maŋgeengatnaŋ ma am msat kapiyetnaŋaŋ nâme ekŋen am tototnaŋ bembenaŋ ma ekŋengat kogogak nâmindeme belakŋaŋ penaŋ bembenaŋ ke ombemindeye. <sup>29</sup> Msalen am ŋenaŋ Kawawaŋgat zikatnan sek mmobot mnakgapmti Kawawaŋ yaŋaŋ kegok mamimindain. <sup>30</sup> Kawawaŋaŋ ikŋaŋgat

ɲoktikɲaŋgalak in indatetimti Zisas Kilaismak tusumindeye ma Kawawaŋaŋ mme Kilaisiyaŋ ningalen ɲoktikɲ beye. Mti Kilaismageset in Kawawaŋaŋ ikɲaŋgat zapat mamayet ma yomengatnaŋ timkwat indemti teŋ mamayet ombemindeye. <sup>31</sup> Keyepmti Kawawaŋgalen Zet Itnaŋaŋ meluwaŋ pigok mimiŋaŋ,

“An ɲenaŋ ikɲaŋgat sekɲaŋ ku mobe. Amobot-  
naŋaŋ mulup mge keyet nâme mobe.”  
*(Zelemmaia 9:24)*

## 2

*Pâlaŋ Zisas kumasasokpepeŋaŋ keyet zapat di-  
indoye*

<sup>1</sup> Âpme Kilaismagen notnne, neŋ inmagen koti Kawawaŋgalen zet enzililiŋaŋ penaŋ zewan ke zet dolakɲaŋ weyaŋti zenze ma ɲoktik temaŋ temaŋ ɲen timti ku diindowan. <sup>2</sup> Neŋ kapigok nâmkatik bemti inmagen koban. Zet notnaŋgat yek; Zisas Kilais tewen kumasasokpewien keyet zapatnaŋ etaŋ diindosât koban. <sup>3</sup> Neŋ inmak mambanen kan keyet neŋ sebetn sukɲaŋ beme kiŋgati sebet diŋdiŋ palen mamban. <sup>4</sup> Neŋ zet zemzikat indandan ma zet zapat zemkawaŋ bewan ke an ɲoktikɲiŋin temaŋaŋ zemkawaŋ bemti mamip keyet kataŋ ku mban. Neŋ Emetak Teŋaŋ winde name Zisasiyelen buŋam zapat ke zemkawaŋ bema in nâmkɲiŋpewien. <sup>5</sup> Wa ke am ɲoktikɲiŋin temaŋ ekɲengalen zet sakam ku zewan. Enenogat neŋ nâmbanen ingalen nâmkɲiŋpepeŋin ke am ɲoktik temaŋ ekɲengalen zelen peme



ku wetekum tatagalen nâmban; Kawawaŋgalen windeen peme wetekumti tatagat nâmban.

*Kawawaŋgalen Emetak Tenŋ kwitnaŋ kwitnaŋ manzemkawaŋ bemndain*

<sup>6</sup> Yaŋgut neŋ am nâmkijpepenjin katikŋan ma Amobotnaŋgat zetnaŋ maŋgawepuip ekŋengat tuŋguwinan talawen buŋam zapat Kawawaŋgalen ŋoktikŋaŋ temaŋmak neŋ zet mandiindoyap. Naman zet manzeyap keyaŋ neŋ am ŋoktikŋin temaŋmak msat kapiyelen amobotnaŋ manzeip keboŋ yek. An ekŋen keyelen ŋoktik ke belakŋaŋ penaŋ bewe. <sup>7</sup> Yaŋgut nin zet enzililiŋaŋ manzenup ke Kawawaŋmagengatnaŋ. Zet enzililiŋaŋ kapi Kawawaŋgalen ŋoktik temaŋ eweŋan baen msat ku weyaŋgeen ke nâmbiliwege. Zet enzililiŋaŋ ke Zisas Kilais nin pembenanŋ bembeyet ketalasim ndaye. Yaŋgut egaŋ an ŋen ku dundum mamkwatnepeme alak tatnuwen kapi kwazin. <sup>8</sup> Msalengatnaŋ amobotnaŋ ŋenaŋ Kawawaŋaŋ ŋoktikŋaŋ temaset kwitnaŋ kwitnaŋ setnaŋ zigoset mamin ke ŋenaŋ ku nâmâtâge. Ekŋenaŋ Kawawaŋgalen ŋoktik temaŋ ke ku nâwien keyepm Amobotnaŋ Kawawaŋgat yaŋaŋ penaŋ mamsokbein ke tewen kuwien. <sup>9</sup> Keyet Kawawaŋgalen Zet Itnaŋaŋ zet meluwanŋ kapigok mimiŋaŋ tazin, “An ŋenaŋ zikalaŋ ku ege ma wagaŋ ku nâmâtâge ma an ŋenaŋ Kawawaŋaŋ kwitnaŋ kwitnaŋ pembenanŋ am ek gogot mammpeip ekŋengat indandayelen weyaŋ beye ke ku eknâmmge penaŋ.” *(Aizaya 64:4)*

10 Nin kwitnaŋ kwitnaŋ pembedaŋ ke nin nâmatâtnup enenogat Kawawaŋgalen Emetak Teŋaŋ zemâtâtndaye. Ke penaŋ enenogat Emetak Teŋaŋ Kawawaŋgalen ŋoktik temaŋ biliwawatnaŋ sambe ke maekmâtâzin. <sup>11</sup> An ŋenaŋ ŋep notnaŋgat keŋaŋgat yaŋaŋ ku nâmatâtdak keŋ toŋaŋaŋ iŋnaŋ kwewetaŋ manâmâtâzin. Kegogak Kawawaŋgat keŋaŋgat yaŋaŋ an ŋenaŋ ku nâin; Emetak Teŋaŋ etaŋ ŋep nâmatâzin. <sup>12</sup> Âpme nin Emetak Teŋ am ŋoktikŋin temaŋmagengatnaŋ ke ku tiwenn. Yek, nin Kawawaŋgalen Zet Zapat Dolakŋaŋ Penaŋ ke eknâmâtât mimiyelengapm iŋnaŋgalen Emetak Teŋ ke ndaye. <sup>13</sup> Keyepmti nin zet mandiindonuwen am ŋoktikŋin temaŋaŋ manzeip keyet kataŋ ku diindowenn yek. Nin zet Emetak Teŋaŋ manzemzikat ndainen ke mandiindonup. Sepem kegogak nin am kwitnaŋ kwitnaŋ mandiindonuwen Emetak Teŋaŋ mandiindoin sepem kegogak mandiindonup. <sup>14</sup> Am ŋen Emetak Teŋaŋpiŋ egaŋ Kawawaŋgalen Emetak Teŋgalen zet ku manâin ek kwilekiŋaŋgat nâmatâtnak? Egaŋ zet ke nâme penaŋepiŋ mambein. Zet ke am Emetak Teŋ tat indain etaŋaŋ maweyaŋnâmatâlip. <sup>15</sup> Am Emetak Teŋ keŋinan tazin ekŋenaŋ kwitnaŋ kwitnaŋ keyet yaŋaŋ ŋep manâmâtâlip. Am Emetak Teŋ keŋinan ku tazin ekŋenaŋ am Emetak Teŋ keŋinan tazin ekŋengat zelin zemdelan zenze mulup ŋep ku mimiyelen.

<sup>16</sup> “Amobotnaŋgat keŋanen zet tazin ke an kwiyaŋ nâŋgeyaŋ ŋep zemâtât zikat same mnaŋ?”

*(Aizaya 40:13)*

Nin Kilaisiyelen ñoktik ke Emetak Tenjañ zikat ndame ke etañ timti manup.

### 3

*Dapmelange ekñengalen an ñejañ bembe ekñen Kawawañgalen mulup an*

<sup>1</sup> Kilaismagen notnne, neñ inmagen koti am Emetak Tenjañ indadamuñ mme mamaip ekñengat zet diindondoyelen keyet katan ku diindowan. Ingat ñoktikñin am msat kapiyelen sepem keboñ ma in Kilaisiyelen bunam zapat ku nâwien keyepmti neñ ingat okak ekñengat zet zewaknok zewan. <sup>2</sup> Neñ meu katikñañ ku indawan, belak nam etañ indama nimbien ma meu katikñañ zigok nimbiek? Enenogat kan pigogak in meu katikñañ niniyelen katan ewe ku beip. <sup>3</sup> Alak in am Emetak Tenjañ indadamuñ mme mamaipnok ewe ku mamaip. Ingat ñoktikñin am msat kapiyelen sepem keboñ nâmti pepet ma atindândândâ tunguwinan mti am nâmkñpepenpiñ ekñenañ mti maip sakam kekok tapmip. <sup>4</sup> In pigok tazeip, “Neñ Pâliyelen am,” ma “Neñ Apolosiyelele am.” Kegok tazeip keyañ zeinen in am msat kapiyelen nembon beip.

<sup>5</sup> Apolos ma neñ nit kwiyepm in nigat egegalen am manzeip? Nit mulup an etañañ belak Kawawañgalen Zet Zapat Dolakñañ Penañ diindomalulu in Kilais nâmkñpewien. Keyet katan Amobotnanañ mulup ikñañgat kwep kwep zemndeyenok mbelin. <sup>6</sup> Neñ alikñañ katnañ etañ onzewan. Âpme Apolos egañ kekok

nusiŋaŋ etaŋ mge. Âpme Kawawaŋaŋ iŋŋaŋ mme penanaŋ sokbeye. <sup>7</sup> Keyepm an katnaŋ ondeye ma nusiŋaŋ mge keyaŋ mulup omba penaŋ mge ŋep ku zenzeyelen. Kawawaŋaŋ mme penanaŋ masokbeingapmti egaŋ mulup omba mamgulak ŋep zenzeyelen. <sup>8</sup> Maondeme mozin ma nusiŋaŋ mamin an eget ke sepemit kwep. Yangut mulup mimiŋit dangat katan tosaŋaŋgulak iŋŋak iŋŋak tiwalup. <sup>9</sup> Nit belak Kawawaŋ mukulem mimiŋaŋ anenet mme in Kawawaŋgalen mulupmaŋgalen msat nembon. Kogogak in Kawawaŋgalen mka nembon nit tawalalup.

<sup>10</sup> Kawawaŋaŋ keŋ taolet mnamti nânâ nanŋe katan neŋ mka walalalaŋ taŋkawat kaliŋaŋ pema towege. Âpme timbilanŋe ilak mpepeŋaŋ keyet palen amnaŋ mka penaŋ tusumti tawatlatmolip keyepm am ekŋen keyaŋ weyaŋ nâmâtâtati walapbep. <sup>11</sup> Kawawaŋaŋ Zisas Kilais amnaŋ mka timbilanŋe mampeipnok bempeye. Zisas Kilais ek am nâmkinpepeŋinmak ekŋengalen mka timbilanŋeŋaŋ keyepmti an ŋenaŋ asekti timbilanŋe alakŋaŋ mimiyeleŋ sakam yek. <sup>12</sup> Âpme mka timbilanŋe mpepeŋaŋ keyet am notnaŋaŋ tusumti gol ma silwa ma nanaŋ tosaŋaŋ temaŋ ma tep ma mgek ma puŋ kawaseŋ kebonaŋ walamobep. <sup>13</sup> Kan temaŋgat Zisas kobe keyet muluwinaŋgat yaŋaŋ tewaŋ zimti mka butnaŋ kwep keyet kwiyaŋ katikŋaŋ ma bakŋaŋ walalanaŋ keyet penanaŋ msokbewe. Mka keyet palen tep temaŋ zimti tewaŋ mka mulup mimiŋaŋ keyet yaŋaŋ msokbewenok am kwep kwepgalen

kegogak mbe. <sup>14</sup> Âpme an ñenan mulupman mka timbilange mpepenanok keyet palanan walage ke tewan zim alewe beme egan keyet tosanan tiwe. <sup>15</sup> Ma an ñenyelen mulupman ke tewan zime delan zemâbe beme mulupman gat tosanan ku tiwe. Âpme mka tonan ke zinziyelen bududuk penan tapmen gut Kilaisyan an iknan ke etan an galanpewe.

<sup>16</sup> In Kawawan galen sesewat mka ma Kawawan galen Emetak Tenan ingat tunguwinan mamain. In kegok namtalip ma yek?

<sup>17</sup> Kawawan galen sesewat mka ke iknan galen etan. Sesewat mka ke dapmelange in kemak. Keyepmti am ñenan Kawawan galen dapmelange sesewat mka nembon ke walebe beme Kawawan galen kegogak an ke waletpewe.

<sup>18</sup> In ken otnânânjin ku tetipewep. In magenganan ñenan nâme ñoktiknanmak bewe beme egan am msat kapiyelen eknenan maotnâit sepem kebon. Egan iknan ñoktiknanmak ku nâwe. Egan kogok peme tapme Zisas namkinpewe keyan mme ñoktiknanmak penan bewe. <sup>19</sup> Enenogat msalengalen kwitnan kwitnan galen ñoktik kebon ke Kawawan galen nâme belaknan penan mambein. Kawawan galen Zet Itnanan meluwan ñen kapigok miminan tazin,

“Egan am ñoktiknin teman eknenan kwitnan kwitnan tetimae palen tapmme Kawawan galen ke timti ankapipilinok ompeme indowe.” *(Zop 5:13)*

<sup>20</sup> Ma ñen ewe kapigok zenzenan,

“Amobotnaŋ egaŋ am nânânjin temaŋ ekŋengalen zet nâme belakŋaŋ etaŋ mambein.” (*Sam 94:11*)

<sup>21</sup> Keyepmti nin ingat an ŋeŋaŋin tapmanup kalaŋ kumndemti, “Neŋ ekmak talap,” zemti sek mmobot palen ku mambeŋ. Yaŋgut kwitnaŋ kwitnaŋ sambe ke ilinaŋgalen zapat: <sup>22</sup> Neŋ ma Apolos ma Kepas nin ingalen zapat mammanup ma msat kululuŋ ma wenzim eyoŋga talip ma gakiki ma alik mama pigogat wein ma bam wemobe ke ingat zapat bein. <sup>23</sup> Ma in Kilais egat zapat mambeip âpme Kilais egaŋ naman Kawawaŋgat zapat bein.

## 4

*Amobotnaŋaŋ ikŋaŋ mulup anene ekŋengat yaŋjin msokbemâbe*

<sup>1</sup> Kogogapm ningat nâmdeme nin Kilaisiyelen mulup an ma egaŋ mulupmaŋgat ŋeŋaŋ bembe ndeme nin amgat Kilaisiyelen buŋam zapat itnaŋaŋ ku nâwien ke zemkawaŋ bembeyelen ndeye kogok nâwep. <sup>2</sup> Âpme Kilaisiyelen mulup an ekŋenaŋ weyaŋti muluwin zemâtâtindendaŋaŋnok nâmsemteŋ mbep. <sup>3</sup> Mti naman pi nanaŋgat yaŋŋ zema nâit. Nâlen mulupgat in ondedakŋinan manzemkwaliŋ beme neŋ keyet yayaŋ ku mamiap. Ma neŋ nâmtalawen neŋ mulupm ŋen ku myuŋguwan. <sup>4</sup> Neŋ Kawawaŋgalen mulup miminaŋgut myuŋguŋgu ŋen ku mban ke nâyap yaŋgut neŋ yompiŋ penaŋ mayap kekok ŋep ku zenzeyelen. Amobotnaŋaŋ nâgât yaŋŋ ewe

msokbewe. <sup>5</sup> Keyepm in amgat yañin bekanan zemti msokbembeyet mulupman sakwep ku mbep. Amobotnan egan iknan koti kwitnan kwitnan enzililiñan tazin ke mkawan bemâbe ma am keñan nânâ ziboñ tapmezin ke kegoak msokbemâpbe. Mme zemdelañ zenze kanen Kawawañan iknan sakamin nânti keyet katan zemesewatindewe.

<sup>6</sup> Kilaismagen notnne, in zet kapi ilak manzeip, “Zet kumpepeñan ke ku sebempepeyelen.” Zet ke yañan kapigok, Kawawañalen zelen zet tazin ke ku sebempepeyelen. In zet ke gawepup beme an ñeñanine ñengat sekñan mmoti ñengat peme topme kekok ñep ku mimiyele. Neñ ma Apolos nigat palen in kekok mamip. <sup>7</sup> In ilinañgat sekñin mmopemti am notnañgat kwit zapalin mamtotpeip. Kegoak ke kwiyañ zemindeyeyepm mamip? Âpme kwitnan kwitnan sambe taindanañgut ekñenmagengatnan kwep ñen Kawawañan ku indadañan, ma? Ekñen sambe ke Kawawañan talasim indandañanñgut in nâme ku indandañanñok beme sekñin mam-molip.

<sup>8</sup> Âpme in nâme, “Kawawañalen zet sambeyet yañan ilak bemisik ndeyeyan manup,” manzeip. In nâme ninpiñ ilinak amobotnan ñep kwebenek zemti ilinagak amobotnan bewienan talip. Neñ nâma in amobotnan ñep tabiek ze nin inmak tusumti amobotnanak tabenek. <sup>9</sup> Amnan kogak nâme nin belakñan pewewenñan gakikiyet zapat penañnok beme tetepulet mimiñdamti yeyenñalen nembon kwitnan kwitnan sam-

beyet zikalinan ma ensel sambe ma msat palen am ilindiŋ penaŋ tatndigip keyepm neŋ nâma Kawawaŋaŋ nin an ombemndemti buŋam zap-atnaŋ zemkawaŋ bembeyelen anene mundum delaŋ zenzeŋaŋ tototnaŋ penaŋ ndeye mam-bein. <sup>10</sup> In nâme nin Kilaisiyelen mulup mam-nupgapmti an kopanok benup. Mme in nâme ilin Kilaisimagen nâmkînpeipgapmti am ŋoktikŋin temaŋnok mambeip. Âpme nin windenpiŋ mme in windenŋinmak kogok nâip. Ma nin totot-naŋ benup mme ilin mobotnaŋ beip kegok nâip yaŋgut enenogat kegok ke zeap <sup>11</sup> nin tu meuyet gakim walet mbennaŋ ewe mamnup. Mti elim-iaŋ miakpiŋ ma kasayaŋ mandoip ma mkayet olat olat palen mamanup. <sup>12</sup> Mti kwileki bugan aikti mamayet nâmti nin betnaŋ mulupmaŋ temaminup. Ma am notnaŋaŋ saik makumndei-waŋgut nin Kawawaŋaŋ pembenay etaŋ mimin-dandayet mandundunup. Ma amnaŋ sisipenpen mti kasa mamndaiwaŋgut nin epumtati dopmaŋ ku mamnup. <sup>13</sup> Amnaŋ dekuku mindame keŋ sewakŋaŋ zet mandiindonup nin mgasik penaŋ bemti msat sambe ekŋengalen isek iseknok bemti mam kobenaŋ ewe mamanup.

<sup>14</sup> Âpme neŋ meluwaŋ kapi sakambuk indandayet ku kuyap. Belak nanaŋgat nemunambanne gogot mimindawaknok mti golaŋ zet etaŋ zemti m indayap keeset indamukulem miap. <sup>15</sup> Kilaisimagen am mukulem mimiŋine sambe penaŋ mene tatindaip, yaŋgut ŋenaŋ ingat biwinnembon penaŋ ku tazin. Neŋ kukuŋaŋgat Zisas



Kilaisiyepm Kawawaŋgalen Zet Zapat Dolakŋaŋ Penañ diindoma nâmkĩŋpewien keeset neŋ kwewetaŋ kapiyaŋ biwin bewanaŋ indadamuŋ mti mayap. <sup>16</sup> Keyepmti neŋ kapigok apitilim indesowap in neŋ mayapnok napmâti mamambep. <sup>17</sup> Keyepmti neŋ Timoti Amobotnaŋmagen nemun pembedaŋ gogot mampeap ma ek an mulupmaŋ nâmsemtaŋ mam zempema inmagen kozin. Koti egaŋ neŋ Zisas Kilais nâmkĩŋpemamti mama mimi mamiap ke ma msat kataŋ meti am manzemzikat indayap eget keyaŋ sepem kwep mambein kegok diindowe.

<sup>18</sup> Inmagengatnaŋ notnaŋaŋ nâgâek, “Ku kobe,” zemi mobotnaŋ mbien. <sup>19</sup> Kegok tapmiwaŋgut neŋ Amobotnaŋaŋ nâme ŋep bewe beme kan belaknik bugan inmagen ke kobap. Koti an notnaŋ mobotnaŋ tapmip ekŋen zeletaŋ tazeip ma Emetak Teŋgalen windemak tazeip ke eknâmbap. <sup>20</sup> Enenogat Kawawaŋgalen zemâtâtât katnaŋ mama ke Emetak Teŋgalen winde palen masokbein amnaŋ zelak zelak etaŋ mamip ke yek. <sup>21</sup> Ke penañ in neŋ ŋenzinziŋmak ku kokogalen nâip nâyap keyepmti in mama mimiŋin weyaŋit mme neŋ gogot ma keŋ sewakŋaŋ palen kobap.

## 5

*Kolin dapmelange mama okbi okbiŋaŋmak mbien*

<sup>1</sup> Neŋ ingalen zapat kapigok ilak penañ dinome nâmti talap. Inmagen kwitnaŋ kwitnaŋ okbi okbiŋaŋmak am Kawawaŋaŋ ku nâmkĩŋpenti

maip notnaŋ ekŋenmagen ku sokbembeyelen ke inmagen sokbemti tazin. Nemunaŋaŋ gilik zemti naman mamaŋ mpelaŋgunŋaŋmak alak set kileŋ malup keyet zeyap. <sup>2</sup> Mama mimi keboŋ mmambe in naman mobotnaŋ igagen tapmip. In mama keboŋ ke weingapmtiŋgut kemberŋ mti an keboŋ ke peme ingat tuŋguwinan ku tabe. <sup>3</sup> Neŋ sekŋnaŋ beŋan pien tapme nânânnanŋ inmagen kopme an muluwaŋ bekananŋ ke mge eget zet ingat tuŋguwinanok mamti zet zewaknok ilak kapigok nâmdelaŋ zewan. <sup>4-5</sup> In ondektapme neŋ keŋŋnan etaŋ inmagen tusumtati zemdelaŋ zempeman an keyet keŋaŋ sekŋaŋ mama mimi itnaŋaŋgalen ke tikŋaŋ nâmezinaŋm Amobotnaŋ Zisas egat kwitnanen Sadaŋgalen kimbalen pemann sek sindem tusumsawe. Nin kekok mmann egaŋ zupman totati keŋ itnaŋaŋgalen tikŋaŋ keyet, “Yek,” zenzeyelen winde timti tabe. Mme keeset keŋan gilik zeme Amobotnaŋ egalen kanaŋ daŋgome an kemak in temakwep Amobotnaŋaŋ indatiwe.

<sup>6</sup> Mama mimi bekananŋ keboŋ tatindame in sekŋin mammolip keyepmti neŋ nâma ŋep penaŋ ku bein. Bo kaŋkaŋaŋ ek isikŋaŋ buganaŋgut bo penaŋ olekme bumann keyaŋ bo penaŋ mme akŋaŋ mambemâzin. Ke in nâip, ma? <sup>7</sup> Sipsip yomgat dopmaŋ kukuŋaŋ ke Kilais. Ingat kaŋkaŋin indam menzemtimaŋbâtnaŋ keyepmti akŋaŋin ekmâtâti peme mepme penaŋin tikŋaŋ bewe. <sup>8</sup> Kilaisiyaŋ ningat yomnaŋgat dopmaŋ gakiye keyepmti kwilekiki akŋaŋ ke katikpewanup ma mama mimi bekananŋ akŋaŋ ke

katikpemti mama mimi busatnaŋaŋmak ma penanaŋmak ke mtati Anŋalalaŋ Kendo Penaŋ ke tatne.

<sup>9</sup> Eweŋan neŋ meluwaŋ ŋen kapigok kuminda dama ekbien. Meluwaŋ keyet keŋanen kapigok zewan in am set kileŋ maip ekŋenmak zenâ zenâ ma aem kwaem ku mbep. <sup>10</sup> E am Kilais ku manâmkinpeip ekŋenaŋ set kileŋ mama ma nolineyelen kwitnaŋ kwitnaŋ ego ego mti kileŋ matip ma am kambu titi ma nâmkinpepe dâsuki notnaŋ mamip ekŋen katikindemti ilinak paŋsetnaŋ tatagat ku nâmti kuwan. Enenogat ekŋen msatgalen am mme nin kogogak msalen kapiyelen am mamanup. <sup>11</sup> Neŋ kapigogapmti kumindawan. An ŋen nâmkinpepeŋaŋmak ŋenaŋ set kileŋ mamain met walebe ma notnaŋgalen kwitnaŋ kwitnaŋ notnaŋ ego ego mti mandamtiwien ma nopiom sesewatindanda ma nolineyet dekuku mamip ma tu katikŋaŋ nimâbât ma kambu titi an. Am ekŋen keboŋ katimindeme met zupman mame in naman ekŋenmak zet zenâ zenâ mti tu meu nimwiaŋ wiaŋ ku mbep.

<sup>12</sup> Neŋ am Kilais ku nâmkinpeip ekŋengat zet zemti ku zemdelan zemindewak. In ilinaŋgat noline Kilaismagen maip ekŋengat mimyuŋguŋguŋinaŋgat musuwewet zet diindome ŋep bewe. <sup>13</sup> Âpme am Kilais ku nâmkinpeip ekŋengalen mimyuŋguŋguŋinaŋgat zetnaŋ Kawawaŋaŋ zemdelan zewe. Naman in Kawawaŋgalen Zet Itnaŋaŋ mâti, “Inmagengatnaŋ am bekanan mimi keboŋ ke indeme ingat tuŋguwinan ku mambep.”

## 6

*Nukñañin notnañ sokbemindame ilinak ku zemdelañ zewien*

<sup>1</sup> Inmagengatnañ ñenañ notnañmak kalalañ mbe beme egañ kalalañit ke mmeti am Kilais ku nâmkîñpeip ekñenmagen notnañ zelen ku pewe. Ekñelañ nâmkîñpepeñinmak ilinañgat tunjuwinan kalalañit ke weyañbalup.

<sup>2</sup> Am nâmkîñpepemak nin maneti am nâmkîñpepeñinpiñ ekñengalen zet zemdelañ zewanup ke in nâip keyepmti ilinañgat tunjuwinan zet notnañ isikñañ sokbeme ñep zet zemdelañ zenze mulup mbep. <sup>3</sup> Nin ensel ekñen kegoak zet zemdelañ zemindewanup ke in ku nâip? Ya nin keboñañ nukñañ notnañ nnañgat tunjupmnañ sokbeme zelin zemdelañ zenzeyet nâmtetem ku mimiyelen. <sup>4</sup> Kalalañ keyelen nukñañ sokbeme am Kilais ku manâmkîñpeip ma dapmelañge ekñenañ an ekñen ke indikme an damuñ ku mambep ekñenañ zet zemdelañ zenze mulup ku mbep. <sup>5</sup> Mama mimi kapi mamip ke nâme sakambukñañmak bembeyet nâmti zet kapi diindoyap. Neñ nâyap inmagen an ñen zet nâmtâtâtâtnañ dolakñañ main in nukñañin ekmagen mmepme egañ ñep zelinañgat zemdelañ zenze mulup mbe.

<sup>6</sup> In kekok penañ ku mamip, yek penañ. An nâmkîñpepemak zulañ nâmbekambemberñit tapme in katikpeme an nâmkîñpepeñepiñ ekñenmagen mmepmalu manzem musuwetindeip. <sup>7</sup> Âk kalalañin zupman mmeti weyañsât zeip beme Kawawañgalen set ku mâti mme keyañ

am nâmkînpepenmak sakambuk indamti Kawawangat kwit zapatnaŋ mamtotpeip. Set keboŋ dolakŋaŋ yek. Nodaŋ myuŋguŋgap ke timane weme nâmpemane gâlen kwitnaŋ kwitnaŋ notnaŋ tiwe.

<sup>8</sup> In ilinaŋgat tuŋguwinan nâmkînpepen noline ekŋengalen kwitnaŋ kwitnaŋ tatetimindem tip ma myuŋguŋgu sambe tapmip. Kok penaŋ ke tapmimindaip ke ŋep penaŋ yek.

<sup>9-10</sup> Am set kileŋ mamaip ma nopiom masese-watsaip ma awembiŋ kalalaŋ mamip ma an anekgaŋ muluwaŋ bekaŋaŋ mamilup ma an kambu titi ma amgalen kwitnaŋ kwitnaŋ notnaŋgat eyak mamip ma am tu kaliŋaŋ omba manip ma nolinaŋgat zentalalat zet manzeip ma kwitnaŋ kwitnaŋ tetimaem titi. Am mama mimi bekaŋaŋ kekok mamip ekŋenaŋ Kawawangalen zemâtâtât katnanen mama keyet keŋan ku mebeŋ keyepmti in bekaŋaŋ sambe kapi ŋep mimiyelen zemti keŋin ku tetipewep. <sup>11</sup> Itnaŋan in notnaŋ sepem kekok ke mti mamkwabien yaŋ pi ilak in Amobotnaŋ Zisas Kilais nâmkînpeme egaŋ yomin sambe zemzuluge. Mme Kawawangalen Emetak Teŋ ikŋaŋgat zapat mame Kawawaŋaŋ indikme an teŋ bewien.

<sup>12</sup> Am notnaŋ, “Kwitnaŋ kwitnaŋ sambe kapi ŋep mimiyelen,” kekok tazeip. Yaŋgut kwitnaŋ kwitnaŋ ke mma ŋep ku napmukulem mbe. Kwitnaŋ kwitnaŋ sambe ŋen mimiyelen tapmezin, yaŋgut ekŋenmagengatnaŋ ŋenaŋ neŋ nadamuŋ mimiyelen ku nâmpewap. <sup>13</sup> Tu meu ke tip kambakŋinaŋgat kwitnaŋ kwitnaŋaŋ etaŋ âpme

tip kambakñin ke tu meuyet elenaj. Kegok kek penaj yangut eget ilisakwep Kawawanaj indawalepme yek bewalup. Sekñ kapi set kilen mama keyet zapat yek; ke Amobotnangot zapat bein. Egan sekñinangot tonajan ikñaj ekdamuj mamm. <sup>14</sup>Âpme Kawawanaj Amobotnan gakikiengatnan mme wage keyet katan maneti egalen windeen sekñ kapi mama alakñaj samti mme wabanup.

<sup>15</sup> Sekñ kwewan butnan butnan sambe sepem kogok nin sambe Kilaisiyet zapalan egat sekñaj kwep keyet butnan kwep kwep benup. Ke in nâip, ma? Ke nâmtiñgulak in Kilais nâmtiñpepenaj in sekñin kilom timeti imbi set kilenmak tusum tapmaip beme ke pembenaj penaj yek. Kelak peme tasem. <sup>16</sup> Kawawangalen Zet Itnanaj meluwan kapigok mimiñaj tazin,

“Egat zulan pepap bemalu sek kwepnok mambein.” *(Sokbembe 2:24)*

Kegogapmti an nenaj imbi set kilen-ton ekmak mepmain beme egan ekmak kenan aem kwaem mti eget kwepnok mambelup. Kegok ke in ku nâip, ma? <sup>17</sup> Ma naman nen egan Amobotnan ekmak tusumti ken kwep bemti pepap mambelup.

<sup>18</sup> Am nenaj yom notnan nen mbe keyan sekñaj zigok nen ku mamsain yangut am nenaj set kilen mambe egan sekñaj Amobotnangot zapat zenzenaj ke walebe keyepmti in set kilen mama eksemti kunzunbep. <sup>19</sup> Ma in kapigok nep penaj nâip, sekñin ke Emetak Tenjalan sesewat mkanok bein. Emetak Tenaj ingalen sekñin keyet kenan ke mamayet Kawawanaj ketalasim indaye

keyepmti ingalen sekñin ke ilinaŋgalen etaŋ yek.  
<sup>20</sup> Enenogat in Kawawaŋaŋ tosa temaŋ penaŋaŋ  
 indakwitiye keyepmti sekñinaŋ Kawawaŋgalen  
 kwizet buŋamaŋ mwawatgat mulup mbe.

## 7

### *Awembiŋ mamayelen zemâtâtât*

<sup>1</sup> In yaŋkwesisi kumbeme koge ke meluwaŋen  
 bemti pigok zemâtâtindama nâit. An ŋenaŋ  
 imbi wawatpiŋ masât nâme e ŋewak bewe.  
<sup>2</sup> Yaŋgut set kileŋ mamayelen tetimaemae temaŋ  
 penaŋ tazin keyepmti an ma imbi ŋenaŋ ap-  
 maŋ ma imbiŋaŋ wati ekmak etaŋ esemteŋ  
 mambe. <sup>3</sup> Kegok mti apmaŋaŋ sekñaŋ im-  
 biŋaŋgat aŋginaŋ ku mpewe ma imbiŋaŋaŋ  
 kegogak sekñaŋ apmaŋgat aŋginaŋ ku mpewe.  
<sup>4</sup> Imbiŋaŋ ikñaŋgat sekñaŋ toŋaŋ yek; ap-  
 maŋaŋ toŋaŋ bein. Ma apmaŋaŋ kegogak  
 ikñaŋgat sekñaŋ toŋaŋ yek; imbiŋaŋaŋ toŋaŋ  
 bein. <sup>5</sup> Awembiŋ, in sekñin aŋginaŋ kileŋ pe-  
 naŋ ku mbep. In dundundu msât kan keyegut  
 an imbiŋaŋ ilisakwep zenâmti keŋ kwep bemti  
 segit aŋginaŋ mti kan tungupmaŋ isikñaŋ bugan  
 ke dundundayet otnâwalup. Mti keyet palaŋaŋ  
 an imbi mama mimiŋit ke ŋep tusumti mam-  
 balup. It kegok mti an imbi mamayet tikñaŋ  
 damuŋ mmalu Sadaŋaŋ tetimae ŋep ku idemti  
 yomen ku idatimtowebe. <sup>6</sup> Awembiŋ mama  
 kapigoset mambiegen ŋep mene benak keyet  
 nâmti zet kapi zeyap. Wa zemkatik bemindemti  
 ku zeyap. <sup>7</sup> Nanaŋgat keŋnaŋ pigok nâyap: Am

sambe pi neŋ mayap kekok imbi wawatpiŋ mam-benek. Yanŋut Kawawaŋaŋ winde sepem igak igak ndame notnaŋaŋ imbi ma an wawatpiŋ ma notnaŋ awembiŋ bembeyelen winde maindain.

<sup>8</sup> Sipkotem ma animbi kwambet ingagulak pigok zeyap: In neŋ imbi wawatpiŋ belak mayap sakam keboŋak mambiek beme ŋep benak. <sup>9</sup> Yanŋut sipkotem ma animbi kwambet in awembiŋ mamayelen sek tikŋaŋ omba tapme sekŋin ŋep ku damuŋ mimiyelen beme awembiŋ ŋep bewep. Mneti sekŋinaŋgalen tikŋaŋaŋ indamandame yom mbepgat awembiŋ ŋep bewep.

<sup>10</sup> Awembiŋ maip ekŋengat zet pigok zema nâit (kapi nenangalen zet yek; Amobotnaŋaŋ zeye): Imbi ŋenaŋ apmaŋ ku asekpemti mebe. <sup>11</sup> Ma ilak apmaŋ asekpemti megeyaŋ main beme egaŋ apmaŋ peme tapme mege ke ewe kot zet weyaŋti wabe. Âk yek beme an ŋen ewe ku wabe. Ma an ŋenaŋ kekok imbiŋaŋ ku asekpewe.

<sup>12</sup> Ma am notnaŋ sambe ingat nanangat keŋnaŋgatnaŋ zet zesowap. Wa ke Amobotnaŋaŋ zet ŋen zeye keyetnaŋ yek. Zet ke kapigok: An nâmkŋpepeŋaŋmak ŋenaŋ imbi nâmkŋpepeŋaŋpiŋ wage yanŋut imbi keyaŋ ekmak mamayet tikŋaŋ nâin beme imbi ke ku asekpewe. <sup>13</sup> Ma imbi nâmkŋpepemak ŋenaŋ apmaŋ nâmkŋpepeŋepiŋ wage yanŋut an keyaŋ ekmak mamayet tikŋaŋ nâin beme apmaŋ ke ku asekpewe. <sup>14</sup> Enenogat neŋ kekok zeya? An Kilais nâmkŋpepepiŋ egaŋ imbi nâmkŋpepemak walep manan imbi nâmkŋpepeŋapiŋaŋ an nâmkŋpepeŋaŋmak walep beme



ekñetmagengatnañ ñenañ nâmkijpepeyet setnañ zulutme ñandem tazingapm Kawawañañ nâme ñep mambein. Keyepmti Kawawañañ keboñagak nemunambañane ekñen maminbiwineyelen nâmkijpepeyepm ekñenmagen kogogak nâmkijpepeyelen setnañ zulutme ñandem tazingapm nâme ñep mambein.

<sup>15</sup> Yangut an ma imbi ñenañ Kilais ku nâmkijpein egañ imbiñañ ma apmañ nâmkijpepeñañmak ñen pemti mesât giñgiñ mme nâmpeme ñep mebe. Keyet zemkululuñañ ñen ku tazin. Enenogat Kawawañañ sewakñañ palen notn notn mti mamayet nâmti indakumtetime kobien. <sup>16</sup> Imbi, geñ apdi mama mimi dolakñañset mukulem mmane egañ nâmkijpepemak benak ma yek? Set ke geñ ku nânik, ma? Ma an, geñ imbindi mama mimi dolakñañset mukulem mpemane egañ nâmkijpepemak benak ma yek? Set ke geñ ku nânik, ma? Keyepm an ma imbi nâmkijpepepepiñ watnagañ geñmak mamayet tikñañ nâin beme asekepepepiñ.

*Nin Kawawañañ mama mimi nâmtikñañ mam-nen mâti mbanup*

<sup>17</sup> In mama mimi zigok mti mame Kawawañañ indakumtetime nâmkijpepeen kwabien ke ilak mti mambep. Neñ zet sakamañ keboñ am nâmkijpepemak mka sambe manzemkawañ bemindam melap. <sup>18</sup> An sekñañ butnañ piliñañmagañ nâmkijpepemak beye beme egañ piliñ ke asesekgalen ku nâwe ma an sekñañ butnañ piliñepiñ tati nâmkijpepemak beye beme egañ sekñañ butnañ piliñmak bembeyelen

nâmti ku antiwe. <sup>19</sup> Sek piliŋmak mamayelen ma piliŋpiŋ mamayelen keyaŋ nâmkiŋpepemak mamayet yaŋaŋ penaŋ ku bein. Kawawaŋgalen zet gawepupu keyaŋ penaŋaŋ penaŋ bein. <sup>20</sup> Keyepmti an ŋenaŋ mama mimi ke ma ke tati nâmkiŋpepemak beye beme mama mimi keyegak mti mambe. <sup>21</sup> Geŋ mulup an tosaŋpiŋ mulup mimi mamti nâmkiŋpepemak bewanan beme mama keyet nâmtemtem mimipiŋ. Yaŋgut geŋ mama ke katikpepeyelen setnaŋ sokbengaween katipewanik. <sup>22</sup> An ŋenaŋ mulup an tosaŋpiŋ manepeme Amobotnaŋaŋaŋ kumtetiye beme egaŋ Amobotnaŋgalen an opepeŋpiŋ beye. Enenogat Amobotnaŋaŋaŋ yomaŋ katikpemmâge. Sepem kegogagak an ŋen opepeŋpiŋ mame Amobotnaŋaŋaŋ kumtetiye beme egaŋ Kilaisiyelen mulup an tegaŋ opepeŋaŋnok beye. <sup>23</sup> Kawawaŋaŋ in ilak tosa temaŋaŋ kwitimindage keyepmti amgalen nânâyet kandaŋaŋ wak bemti ku mambep in Kawawaŋ mâti zet kapi etaŋ nâwep. <sup>24</sup> Kilaismagen notnne, an ŋenaŋ mamaŋaŋ zigok tapmmamti nâmkiŋpeye egaŋ mama mimi keyegak tapmmamti Kawawaŋaŋaŋ nâmkiŋpemt mambe.

*Am awembiŋ bemti mama ma awembiŋ ku bemti mama keyaŋ zetnepiŋ*

<sup>25</sup> Âpe pi am awembiŋ bembepiŋ maip ekŋengat yaŋkwesisi bewien keyet dopmaŋ gilik zesowap. Awembiŋ bembepiŋ maip ekŋengat Amobotnaŋaŋaŋ zet windaŋaŋbeŋ zeye ŋen ku mta-lap. Yaŋgut Amobotnaŋaŋaŋ kemberŋ mnayeyepmti

neŋ zet penaŋ zeyap ke in ɲep mimiyelen. <sup>26</sup> Kan pigogat nukŋaŋ igagen penaŋ tasokbein keyepmti an ɲenaŋ imbi wawatpiŋ mamayelen zeme neŋ nâma dolakŋaŋ penaŋ bewe. <sup>27</sup> Ma imbindimak manik beme imbi ke asekpesâgât ku nâwanik. Ma geŋ gitak belak manik beme imbi wasâgât ku zewanik. <sup>28</sup> Yanŋut imbi wasât mbanik beme ke wapmane yom ku bewe ma imbi ɲenaŋ an wapme keyaŋ yom ku bewe. Kegok ɲewaŋgut kan pigogat nukŋaŋ igagen penaŋ tasokbein keyepmti kekok ku mti mamayelen nâmti kekok zeyap.

<sup>29</sup> Kilaismagen notnne, zet pi zema nâit. Kan delaŋ zenze ilak bududuk bugan bein-gapmti an imbiŋaŋmagaŋ Amobotnaŋgat mulup omba penaŋ mamambe yanŋut nâme imbi ku wage nembon bewe. <sup>30</sup> Ma si zemsu zemsu mamip ekŋenaŋ si kemberŋin ɲeŋinan bemti Kawawaŋgalen mulupgat omba penaŋ ku manâip ma am oloŋen palen maip ekŋen oloŋeŋin ɲeŋinan bemti Kawawaŋgalen mulupgat omba penaŋ ku manâip. Ma am milawat makwitip ekŋenaŋ milawat keyet nâme tatat katikŋaŋ tabe nâmti keŋin temaŋ keyet ku bewep. <sup>31</sup> Ma am aem kwaem mulup mamip ekŋenaŋ mânep mulupgat etaŋ nâme mobotnaŋ penaŋ beme ku mambep. Enenogat msat ma kululuŋ kapi ilak sakwep delaŋ zesâpm.

<sup>32</sup> Mneti in kwitnaŋ kwitnaŋ belakŋaŋ kebonŋ timti mamti ɲoktikŋin temaŋ keyet bemti nâmtemtem palen mambepmagen zemti keyet zemâtâtindayap. Imbi wawatpiŋ ekŋenaŋ

Amobotnaŋgalen mulupgat yayaŋin omba penañ tatindain eneyet ekŋenmagen opepenañ ŋen ku tazin. Egaŋ Amobotnaŋaŋ mama mimi nâmtikŋaŋ min ke mâti mam. <sup>33</sup> Yaŋgut animbimagaŋ sekgalen bandim keyet nâmtetem mamin. Mti imbiŋaŋaŋ nâmpeme dolakŋaŋ bembeyelen mulupmaŋ mamm. <sup>34</sup> Kogok mti ŋoktikŋaŋ sambe makalaŋzin. Âpme imbi apmepiŋ ma imbi nembip ekŋenaŋ keŋin ma sekŋin Amobotnaŋgat zapat sasât manâip mti Kawawaŋgalen mulupgat yayaŋ omba penañ mamip enenogat ekŋenmagen opepeniŋ ŋen ku tazin. Mme naman imbi awinmak ekŋenaŋ sekgalen bandim keyet nâmtetem temaŋ mamip. Mti awinaŋ nâme dolakŋaŋ bembeyet mulup mamip. <sup>35</sup> Neŋ nukŋaŋ palaŋinan bemti ku zeyap yek. Neŋ zet kapi in indamukulem mimiyelen nâmti diindoyap. Neŋ in kwilekiyaŋ penañ ma pembenañ ke mimiyelen nâmindayap mti keŋin ma sekŋin melesiŋ ondekme Amobotnaŋmagen mebegalen nâmti zapat kapi diindoyap.

<sup>36</sup> Yaŋgut imbiŋaŋ an zapatnaŋmak awembiŋ sakwep ku bemti damuŋ teepmaŋ tati welut beme ke pembenañ yek. Egeleŋ kekok milut beme yom milut. <sup>37</sup> Yaŋgut an ŋenaŋ imbi zapatnaŋ zempepeŋaŋaŋgut nâme egaŋ ikŋaŋgat sekŋaŋgalen tikŋaŋ ke ŋep ekdamuŋ mimiyelen winde tasainaŋ imbi zapatnaŋ ku wazin beme keyañ yom ku bein. <sup>38</sup> Keyepm an ŋenaŋ imbi zapatnaŋ wazin beme ke ŋep bein ma egaŋ imbi zapatnaŋ ku wazin beme keyañ naman dolakŋaŋ penañ bein.

<sup>39</sup> Imbi ñen apmañ mambeen egañ apmañmak tâtâñit tapme mamambe. Apmañ gakimeñgut bam an ñen wasât nâmti egañ eknâmâtâti an Kilais nâmkinepepeñañmak beme wabe. <sup>40</sup> Imbi egañ ewe an ñen wawapiñ mambe egatgulak nâma dolakñañ bein. Ke nanañgat keñañgalak zeyap yañgut Kawawañgalen Emetak Teñañ keñañ tazin keyañ keñ m elen beleñ beme zeyap.

## 8

### *Sonjom nopiomgat sâpe sâpe sasayet nsâti nâmâtâtati nimbep*

<sup>1</sup> Âpme pi naman nopiomgat sâpe sâpe masaip keyet pigok zema nâit: Nin nâmkinepepegamañ nânup nin sambe nânân tatndain. Nânâ temañañ am notnañ mme sekñ mobot mamip yañgut nin am gogot mimindenup beme nin mukulem mimindemann ekñañañ Ambotnañ weyañti dolakñañ mâbâgalen manânup. <sup>2</sup> Inmagen an ñenañ nâme ikñañgat nânâñañ omba bein beme egañ, “Neñ ñep nâyap,” zet zein keyañ mkawañ beinen an ke Kawawañgalen nânâ penañañ penañ yañañ ewe ñep ku nâin. <sup>3</sup> An ñen egañ Kawawañ gogot mampein beme Kawawañañ ek ekti zein, “An keyañ nânâ penañañ yañañ ñep nâin.”

<sup>4</sup> Keyepmti neñ zet ñenañ nopiomgalen sâpe sâpe meu kukñañgat bembenañ niniyelen kapigok zesowap: Nin nânup nopiom ke amnañ sâsâñañ mamañañ ma ekñañ ke Kawawañ penañ yek. Kawawañ kwewañ penañ mamain ke nin nânup. <sup>5</sup> Am notnañ kawawañ

notnaŋ penaŋ kululuŋen ma msalen talip manzeip. Penaŋ, ekŋenaŋ amobotnaŋ sambe ma kawawaŋ sambe talip manzeip. <sup>6</sup> Yaŋgut nin nânuwen Kawawaŋ ek ningalen Bipm ek kwewaŋ penaŋ mamain. Egaŋ kwitnaŋ kwitnaŋ sambe kapi Amobotnaŋ melakwep Zisas Kilais ekmagesetgatnaŋ etaŋ mme sokbemâge ma egaŋ mme nin ikŋaŋ manâmkiŋpemti ekmak mamanup.

<sup>7</sup> Yaŋgut zet penaŋ kapi am ilindiŋ ku nâmâtâlîp. Am notnaŋ sambeyaŋ nopiomgat nâme mobotnaŋ penaŋ beyeyepm alak pigogat meu keboŋ ke nim nâme nopiomgalen meu mambein. Ekŋen keboŋ keyet nâmkiŋpepeŋin tuwat tuwat ma ekŋenaŋ keŋinan nâme meu ke niyo beme am yomtoŋ kogok nâyo. <sup>8</sup> Kawawaŋaŋ tu meuyepm nâmndeme mobotnaŋ ku bewanup. Nopiomgalen tu meu kiŋgabanup keyepm ku nâmbekambem ndewe ma ke nimann ku zemesesawatndewe.

<sup>9</sup> Ma notnaŋ in yaŋaŋ weyaŋ nâmâtâti manip in noline nâmkiŋpepeŋin tuwat tuwat tazin ekŋen keŋin myuŋgume yom beweyet eksewep. <sup>10</sup> Âpme geŋ nânândi ke tazinaŋ met nopiomgalen sesewat mkaen moti egat meu bumbembeŋaŋ ke tatni-mané nodi ŋen nâmtemtemŋaŋmagaŋ gikti egaŋ tatniŋgat nimbi kogok zemti nime yom bewe keyet geŋ eksewanik. <sup>11</sup> Enenogat nodi kapiyet Kilaisiyaŋ egat mti gakiye ek nâmkiŋpepeŋaŋ tuwat tuwat ke gâlen nânâ keyaŋ mme sukŋaŋ bemti meu ke nimti nâme yom beme walebe. <sup>12</sup> Set kegaset in noline nâmkiŋpepeŋin tuwat tuwat waletindemti yom miyo. In kegok miyo

keyañ in Kilais yom msayo bein. <sup>13</sup> Keyepm notn Kilais manâmkinpenañ meu nopiomgat sâpe sâpe bembenañ ke nima yom besem nâin beme neñ meu keboñ ewe ninipin penañ mamambap. Enenogat neñ ek mma yom ku mimiyelen kogok nâmti mbak.

## 9

### *An Zisasiyañ egalen zet zemkawañ bembeyelen ombemti kumtetitiñañgalen mama*

<sup>1</sup> Zet zemkwala keyet butnañ ñen ewe kapi zesowap. Neñ kwitnañ kwitnañ keyañ ku naopemneneñañ. Neñ belak âlâgâlâk talap. Ma neñ Amobotnañ Zisas penañ ekban. Neñ Amobotnañgalen mulupmañ penañ ingat tunjuwinan mamti mban keyepmti in nâmkinpepemak bewien. Keyepm neñ Zisasiyet buñam zapatnañ zemkawañ bembé an ombemnakumtetitiñañ penañ talap. <sup>2</sup> Am notnañ nâme mene neñ Kilaisiyelen buñam zapat zempalakñañ bembé an ku ombemnemti nakumtetitiñañ ku beyawañgut in yaññ penañ sukwep nâmneip. Enenogat neñ Kilaisiyelen buñam zapat zempalakñañ bembé an ombemnemti nakumtetitiñañ mamti zapatnañ diindoma in Amobotnañ nâmkinpewien keyañ neñ an kwi keyet yaññ penañ msokbeye.

<sup>3</sup> Âpme yañnañgat zet kuku mti nâgât Zisasiyelen buñam zapat zempalakñañ bembé an ombemnemti nakumtetitiñañ ku manzeip ekñen keyet zet dopmañ kapigok gilik zemindayap.

<sup>4</sup> Nin inmagen mulup mamnupgapm in tu meu

ndandayelen ñep wekukuyelen yangut nin ku mawekunup. <sup>5</sup> Amobotnanggat nembrañne notnañ ma meniñane ma Sipas ekñenañ imbiñinemak zet zapat dolakñañ manzemelip. Keyepmti notnañ nin sepem kegok mimiyelen nâmbenek beme nin ñep kogok mbenek. <sup>6</sup> Kulekiyet neñmak Banabas nit betndañ mulup mti mânep keeset aikti meu kwitim niniyelen mamilup âpme ekñenañ in indapelañgunyuet manzeip? Ke set pembrañ yek.

<sup>7</sup> Kasa kuku an ñenañ mulupmanen mamti ikñañgalen mânewañ tu meu ma kwitnañ kwitnañ sambe ke kwititiyelen mulup belakñañ ñen mti keeset mukulem ku matin. Ma an ñenañ mulup mip keyet penañañ weme belak peme tatagalen ku maondein yek. Egañ meu penañañ ñep bep ke akumti manin. Ma bo toñañañ ekdamuñ mme sememe kumti manin. <sup>8</sup> Pi an zet etañ ku zeyap; zet kapi zii zelen keyegak zemkawañ bembrañ tazin. <sup>9</sup> Mosesiyelen zii zelen zet ñen kapigok meluwañ mimiñañañ tazin, “Bupaloyañ mulup mgemti kwañ sinañ nsât mme ku añañañ mpewanik.” *(Zii Zet 25:4)*

Âpme Kawawañañ zet ke bupalo ekñengat etañ nâmti ku zeye. <sup>10</sup> Zet ke am ningat penañ zenzeñañ. An mulup mimonze onze mamm ma an meu penañ maakumbein egelañ meu penañ ke ilisakwep kalañti nimbalut ke nâmti mamilup. <sup>11</sup> Âpme nin Kilaisiyet buñam zapat diindowen kan keyet nin mulup an mulup mimondendeyelen zapat sakam keboñ mbenn. Nin mulup keboñ mman Emetak Teñañ ingat



keņinan topmaņge keyepmti nin inmagengatnaņ segalen mukulem mimiyelengat omba penaņ ndandayelen ku mawekunup. <sup>12</sup> Mulup an notnaņaņ inmagengatnaņ segalen bandim titiyelen beme nin kegogagak segalen bandim titiyelen bein enenogat nin inmagen mulup yaņbemti mbenn. Yaņgut nin inmagengatnaņ meu milawatgat ku wekuwenn. Mneti Kilaisiyelen zapat pembenañ bekekpewanekmagen zemti inmagen titiyelen zenzenañ ke katikpewan. <sup>13</sup> Zelusalem mka temaņgalen sesewat mka temanen an mulup mamip ekņenaņ meu sesewat mka temangatnaņ matinip. Ma an sâpe sâpe sisagen mambuip ekņenaņ keyetnaņ meu butnaņ niniyet zenzenañ timti manip. In set ke ņep penaņ nâip. <sup>14</sup> Âpme set keeset Amobotnaņaņ Kawawaņgalen Zet Zapat Dolakņaņ Penaņ zenze an nin zet zapat dolakņaņ zemepman am ekņen keyaņ tu meu aikndame niniyet nâmti zet ke diindoye.

<sup>15</sup> Neņ set ke ku mamâlap. Mti in sakam keyet katanā mnanayelen otnâmti meluwaņ ku miyap yek. Nen betnnaņaņ mulupmaņ mti maaikniyaņ keyet nâma mobotnaņ mambein. Enenogat ingat tu meuyet indawekumindandayet nâma sakambukņaņmak penaņ mambein. <sup>16</sup> Kawawaņgalen Zet Zapat Dolakņaņ Penaņ zempalakņaņ bembeyelen mulup ke zemkatikbemti ilak nâgât belen bempepeņaņ yaņgut neņ am buņam zapat dolakņaņ diindondopiņ mma wakai Kawawaņaņ sindem omba penaņ nawe keyepm buņam zapat manzempalakņaņ beyap keyet sek mmobot zet zema dolakņaņ penaņ ku besem. <sup>17</sup> Mulup ke

nanangat keñnañgalak sokbemti mbak ze maneti tosañan tiwak. Yangut nanangat keñnañgalak mulup kapi ku tiwangapm pigok ñep zewi, Kilaisiyan Kawawañgalen Zet Zapat Dolakñan Penan zenzeyelen zeneñgeyepm manzeyap.

<sup>18</sup> Kawawañgalen mulup mamipgat tosañin kapigok: neñ Kawawañgalen Zet Zapat Dolakñan Penanñgalen mulup mmeti am mulup keyet tosañangat ku wekuwap. Kawawañgalen Zet Zapat Dolakñan Penan manzeap keyet tosañan ñep titiyelenañgut keyet ku mawekuyap. Keñ oloñen nâyap keyan tosañnok bein keyet nâma pembedan bein. <sup>19</sup> Neñ zet kebon keyan ku naopemneme talap keyañgut neñ am sambeyet kilambañinan gwidikti ekñengalen sisiliñ an beyap. Enenogat neñ keeset am sambe indatetima Kilais ñep nâmkijpepeyelen nâmti mamiyap <sup>20</sup> Keyet yanñan neñ Zuda am ekñenmak mamti Zuda am ekñengalen mama mimi timti ekñenan Kilais nâmkijpepeyelen mulupman mban. Zii zet keyet sisiliñ mulup mamip ekñenmak tusumti ekñengalen mama mimi keyet meti zii zetgat sisiliñ mulupnok mban. Mosesiyelen zii zet itnañan nâgât damuñ ku mam keyañgut am keyet sisiliñ mulup mamip ekñenan Kilais nâmkijpepeyelen kekok mamiyap. <sup>21</sup> Neñ Kawawañgalen Zet Zapat Dolakñan Penan am Zuda manñeen ku sokbembenañ ekñen zemkawañ bembeyelen ekñenmak mamti ekñengalen mama mimi ke timti sepem ekñen nembon Zuda amgalen zii zepiñ mamayap. Âpme kogok mama

ekņenaņ Kilais nāmkiņpepeyelen mamiyap. Kapiyaņ neņ zii zet maanjosoyap kogok ku bein enenogat Kilaisiyaņ neņ mama mamayelen mandinoink mayap. <sup>22</sup> Âpme Kawawaņgalen Zet Zapat Dolakņaņ Penanen Kilaisiyet yaņaņ mandiindoyawen am nāmkiņpepeņin tuwat tuwat ekņenaņ kwilekiki nâme bekaņaņ am nāmkiņpepemaņaņ ku mimiyelen bein ke neņ belak mapeyap. Kogok mti neņ mukulem mimindema weyaņ nāmâtâlîp ma set kekok set neņ am sambe yaņaņ yaņaņ maipnok ma mama ekņenaņ Zisas Kilaisiyet nāmkiņpewep. <sup>23</sup> Keyepm neņ set ekņen sambe ke mma am sambe msat kataņa ekņenaņ Kawawaņgalen Zet Zapat Dolakņaņ Penan nâmti neņ ma in sambeyaņ kwitnaņ kwitnaņ pembedaņa sambe Kawawaņaņ am Kilaisiyelen buņaņ zapaņaņ manāmkiņpeip ningat zetik mimndaye ke titiyelen mamiyap.

<sup>24</sup> Âpme in pigok nâit, kanzowak mimi mundumen am sambe ekņenaņ ilinsakwep yaņbempti winde mambeip. Yaņgut an ņenaņ winde bempti ņenaņ piliņa ke kwati milawat ke matin. Âpme in kekokak kululuņgalen milawat tazin ke tisât nâwep beme in winde bewewen an ņenaņ bempti makwazin kekok winde bewep. <sup>25</sup> Am ekņenaņ msalen kanzowak msâti sesep mulup tagoņgoņepiņ mti kwitnaņ kwitnaņ notnaņ eksesaņaņmak mti mamaip. Ekņenaņ msalengalen milawat sakwep waleletgalen keyet kekok mamip. Nin mama kanzizitgalen milawat kululuņen kanzizit matazin keyet kekok mbanup.

<sup>26</sup> Nenn kegogak piliŋ bembenaŋ ke ektati keyet esemtenŋ mawindem beyap. Neŋ nasamek belak tungupman kileŋ kuma elepema mezin weyaŋti tenŋ maeleyap. <sup>27</sup> Neŋ am Kawawaŋgalen Zet Zapat Dolakŋaŋ Penanŋ manzemkawaŋ bemin-danetiŋgut nenn zet ke ku mâti mbap beme walelet aikbap keyepm sekŋnaŋgalen tikŋaŋ igak igak ke mtotpenti nen damuŋ mma etaŋ ma-main.

## 10

### *Islael myungunŋinaset ningat golaŋŋ titiŋaŋ*

<sup>1</sup> Kilaismagen notnne, neŋ eweŋan yeŋsokŋne ekŋenaŋ Moses mâti mama mimi mkwabien keyet zapatnaŋ mimindama nâit. Ekŋen ilindiŋ zanzayaŋ indautukekme meti nembu diliŋ zem metat kotat mme Kawawaŋaŋ atamtapme tungupmaset walelepiŋ nembelen mepataŋ zewien. <sup>2</sup> Âpme ekŋen am mange kwep Mosesiyaŋ ŋeŋaŋ bemindeme ekmak zanza mâbien ma nembu diliŋ zemti metakotat mti katime tungupmaset mebien. <sup>3</sup> Âpme ekŋenaŋ ilinsakwep tambu katanŋ Kawawaŋgalen Emetak Tenŋaŋ mme kululuŋengataŋ meŋu sepemaŋ kwep matotan ke nimbien. <sup>4</sup> Ma ekŋenaŋ Kawawaŋgalen Emetak Tenŋaŋ nanzaŋ kapilaŋ sepemaŋ igagen keyetnaŋ tu mme kwapme ekŋen ilindiŋ nimbien. Nanzaŋ kapilaŋ ke Kilais ikŋaŋ nemboŋ. Egaŋ deset ma deset mebien ke ekŋengat windeninaŋgat yaŋaŋ ŋotekŋaŋ penanŋ tapme mamamtemien. <sup>5</sup> Kawawaŋaŋ kwitnaŋ kwitnaŋ sambe weyaŋindeyeyaŋgut sambeyaŋ

Kawawaŋaŋ nâŋge kogok ku mambiengapm egaŋ zemindeme msat zetik mimindendaŋ ku mebegalen zemti notnaŋ indeme msat tungupman amnaŋ ku maiwen gakiwien.

<sup>6</sup> Ekŋenaŋ mama mimi bekaŋaŋ msâgât keŋin temaŋ wemindaye keyepm ekŋenmagen kwitnaŋ kwitnaŋ sokbeye. Keyaŋ ningat golaŋ tin mneti nin kegogagak mbenekmagengat. <sup>7</sup> Kawawaŋgalen zet Itnaŋaŋ papiaen meluwaŋ pigok mimiŋaŋaŋ tazin,

“Am ekŋenaŋ nopiomgat kandaŋaŋ totati tu meu nimwianŋti silik kumti wendiwien.” (*Kisim Bek 32:6; Makuku 25:1-3*)

Ekŋenmagen notnaŋaŋ nopiom sesewatpewien. Nin sepem kegogak ku mbanup. <sup>8</sup> Ekŋenmagen notnaŋaŋ kegok mme kasup kwep keyet Kawawaŋaŋ am sambe penaŋ (23 tausen) indawalege keyepm nin set kileŋ ekŋenaŋ mambienok ku mambanup. <sup>9</sup> Ekŋenaŋ Kawawaŋ m ekmeyepm Kawawaŋaŋ nombe zemindeme koti indime gakiwien. Kegogapm nin Amobotnaŋgat m ek m ek mimiyeleŋ yom omba penaŋ ku mmobanup. Penaŋ, egaŋ dopmaŋ ekŋen gilik zemindayenok ndawe. <sup>10</sup> Âpme in Kawawaŋgat kwileki ŋen ku tatndain zemti kwelat zet ku dunduwep. Ekŋenmagen notnaŋaŋ kegok mme ensel am indome gakikiyelaŋaŋ koti indome gakimâbien.

<sup>11</sup> Âpme msat kululuŋ asesekgalen kanaŋ bududuk tabeme manupgapmti ekŋenmagen kwitnaŋ kwitnaŋ sokbeye ke ningat golaŋnok bein. Nin ekŋenaŋ mama mimi mgasik

mbien kekok ke ku mne. <sup>12</sup> Âpme an nenan nâme egan Amobotnangot nâmkinpepejan tazingapm tetimaean katiknan benak nân egan weyaneksewe. Enenogat ek nep tetimaeme am itnanan eknenan yom mbienok mnak. <sup>13</sup> Inmagen tetimaemae masokbein sepem kegogagak am sambe masokbemindain. Âpme Kawawanang zemkatik bemenan mamâzin keyepm egan peme tetimaemaeyan ingalen winderin anjosomti ku masokbein. Yangut tetimaemaeyan inmagen masokbein beme Kawawanang indamukulem mimiyele setnan nep weyanme in katik bem tapme tetimaemae keyan nep ku mamtoindein.

<sup>14</sup> Keyepmti Kilaismagen notnne penan, in nopiom masesewatindap ke bamkumpemti kunzunjit. <sup>15</sup> In zet opeem nânâyelen nânânjin tazin keyepmti zet kapi zema ilin opeemti nâseip. <sup>16</sup> Okowen wain mannap kan keyet nin Kilaisiyet sipman ningalen yomgat mti mulage ke otnâmti nin keyet Kawawanang wisikn manzenup. Âpme nin wain mannuwen kan keyet nin am sambe Kilaisiyen ekngat yominangapm sipman mulage ekngat bulinan tusunup kekok masokbein. Âpme nin nupmaman mutumti mannuwen kan keyet nin Kilaisiyen gakimti seknan ningalen yomgat dopman ndaye kan keyet maotnânap. Nin kokok mti am sambe Kilaisiyen ekngapmti seknan talasiye eknen keyet bulinan tusunup kekok masokbein. <sup>17</sup> Keyepmti nupmaman kwepnok âpme nin sambeyan nupmaman iknan kwep ke mannap.

Âpme nin nupmamaŋ nsakwep mannuwen keyaŋ nin butnaŋ sambenok keyaŋ ondekti sek kwepnok benup kekok masokbein.

<sup>18</sup> Âpme ŋen pigok zema nâit, Zuda am sambe kwi ŋenaŋ sâpe sâpe me u sisak dukŋan bum-bunaŋ manip ekŋenaŋ ilinsakwep sisak keyelen Kawawaŋ masesewatsaip. <sup>19</sup> Neŋ zet notnaŋ zemkwala keyet in nâmkileŋ bemti nâgât egaŋ nopiomgat sâpe sâpe me u sasaŋaŋ keyet nâme sâpe sâpe penaŋ bein ma nopiomgat nâme Kawawaŋ penaŋ bein. Kegok ke yek. <sup>20</sup> Yaŋgut neŋ neman guluk gilik tazeyap ke am Kilaisiyet ku manâmkijpeip ekŋenaŋ nopiomgat sâpe sâpe mambumsaip ke wa Kawawaŋgat yek. We bekaŋaŋ masesewatpeip bein. Kok keyepm neŋ in we bekaŋaŋmak tususuyelen ku nembein-gapmti ekŋen eksemindendepiŋ. <sup>21</sup> In Amobotnaŋgalen okowen wain nti naman dembusek kwep keyaŋak we bekaŋaŋgalen windey et taze-mopenik keyaŋ pembedaŋ yek. Ma in nupmamaŋ Amobotnaŋaŋ ikŋaŋgat sekŋaŋ otnâmti niniyelen ningat ndaye ke nti naman dembusek kwep keyaŋak we bekaŋaŋgat soŋgom sasaŋaŋ ke ŋep ku niniyelen. <sup>22</sup> Nin kogok mmann Amobotnaŋaŋ ningat keŋ kuku mti ŋenzinziŋ penaŋ mbe. Nin nâmann nin windenmak beinaŋgut egalen musuwewet ke nin ŋep ku sebempepeyelen penaŋ.

*Iliŋaŋgat etaŋ otnâna keyaŋ pembedaŋ yek*

<sup>23</sup> Am notnaŋ, “Kwitnaŋ kwitnaŋ sambe kapi ŋep mimiyeleŋ,” kekok tazeip yaŋgut kwitnaŋ kwitnaŋ ke mma ŋep ku napmukulem

mbe. Kwitnaŋ kwitnaŋ sambe tapmezin keyaŋ nâmkijpepen katikŋaŋ bemti mamayelen setnaŋ ku kabemndawe. <sup>24</sup> Am nâmkijpepemak ŋenaŋ kwitnaŋ kwitnaŋ ikŋaŋ mukulem mimiye-len etaŋ ku mbe egaŋ naman am notnaŋ indamukulem mimiye-len keeset mbe.

<sup>25</sup> In soŋgom kwitisât omkwiti kwitim mundu-manen meti soŋgom ke nopiom sâpe sâpe sasaŋaŋ keyet yaŋkwesisiŋiŋ ŋep kwitiwep. <sup>26</sup> Enenogat Kawawaŋgalen Zet Itnaŋaŋ kapigok zenzeŋaŋ, “Msat ma kwitnaŋ kwitnaŋ sambe msat palen tazin ke Amobotnaŋgalen etaŋ.” (*Sam 24:1*)

<sup>27</sup> Am Kilais ku nâmkijpein ŋenaŋ tu meu weyaŋbemti indazemtetime keŋinan mobogalen indembeme ŋepgat ekŋengalen mkaen mowebeŋ. Mowepme ekŋenaŋ tu meu indame nâmtetem mti nopiomgat sâpe sâpe bumbu mundumaŋgatnaŋ kwitiyo zemti ku indayaŋkwesiwep. Belak nimbep. <sup>28</sup> Yaŋgut in nsâgât tapmme an ŋenaŋ pigok diindowe, “Soŋgo kapi nopiomgalen sesewat mkaengatnaŋ.” Zeme nâmti in ke ku nimbep. An zet zemkawaŋ bemindawe egat otnâmti meu ke ku nimbep mneti ŋoktikŋinaŋ nâmnukŋaŋ mbepgat. <sup>29</sup> Wa in nâme bekaŋaŋ beingapm ku nimbep kogok ku zeyap yek. An ŋen keyaŋ nâme bekaŋaŋ bein egat mti ku nimbep. Yaŋgut an ŋenaŋ kapigok mene zein, “Neŋ kwitnaŋ kwitnaŋ keŋnan nâma ŋep mimiye-len bein beme an ŋenaŋ nâme bekaŋaŋ bein beme keyepm egaŋ neŋ ŋep ku zemkolumneneyelen. <sup>30</sup> Neŋ Kawawaŋgat



wisikŋ zemti niyap beme an belakŋaŋ ŋenaŋ, ‘Geŋ an bekananŋ,’ ke ŋep ku zenak. Enenogat neŋ kwitnanŋ kwitnanŋ sambe msat palen tazin ke Kawawaŋgalen etaŋ nâyap.”

<sup>31</sup> Notnanŋ kogok zewien mene mme neŋ kapigok zesowap, in tu meu nimbep ma kwitnanŋ kwitnanŋ sambe mbep ke in mme Kawawaŋgat kwitnanŋ m onzempepeyet nâmti mbep. <sup>32</sup> In kwileki ŋen mme Zuda am ma am Zuda maŋgeen ku sokbembeŋaŋ ma Kilaisiyelen am nâmkirŋpepenimak ŋen setnanŋ bekekme Kawawaŋ zetnanŋ ku mâbeyet eksewep. <sup>33</sup> In neŋ mamiyapnok mamambep. Neŋ kwitnanŋ kwitnanŋ sambe mamiyap ke mma amnanŋ oloŋen mimiyelen nâmti mamiyap. Nanaŋgat pembedanŋnanaŋgat etaŋ ku mamiyap. Neŋ kegogak am sambeyet pembedanŋnanaŋgat nâmti mma am sambe Kilaisiyaŋ aŋgalaŋindendeyet nâmti mamiyap.

## 11

<sup>1</sup> Neŋ Kilaisiyelen set kaisasat ekti mâti mayap. Âpme in kegogak nâlen set kaisasat ke ekti namât mambeb.

### *Silik dundundu mimiyelen zemâtâtât*

<sup>2</sup> In Zuda am ekŋengalen mama mimi mâti mamayet neŋ zemâtâban keyet katanŋ mamaip keyepmti ingat nâma dolakŋaŋ penaŋ beme oloŋen miyap.

<sup>3</sup> Âpme pi naman Zuda am ekŋengalen mama mimi ŋengat zet kapigok zema nâit. Angat yaŋaŋ Kilaisimagatnanŋ kozin. Âpme imbi

kogogak egat yaŋaŋ anmagengatnaŋ kozin. Âpme Kilaisiyet yaŋaŋ Kawawaŋmagengatnaŋ kozin. <sup>4</sup> An ŋenaŋ bunduŋ ŋokŋanen munduŋ tati dâpmeleŋge tunŋuwinan dunduwe ma Kawawaŋgalen zet zapat dolakŋaŋ zewe beme egaŋ Kilais sakambuk sawe. <sup>5</sup> Ma imbi ŋenaŋ saŋgum ŋokŋan ambululupiŋ tati dunduwe ma Kawawaŋgalen zet zapat dolakŋaŋ dâpmeleŋge tunŋuwinan zemkawaŋ bewe beme egaŋ apmaŋ sakambuk sawe.\* Kogok min beme egaŋ imbi ŋokŋaŋ pilik pilik kwanzetpepeŋan nembon bein.† <sup>6</sup> Keyepmti imbi ŋen sâk ambululupiŋ mame ŋok sinaŋ antim pewep. Ma egaŋ keyet sakam mti ŋok sinaŋ antitipiŋ mbe beme ek sâgaŋ ŋokŋaŋ ambulut be. <sup>7</sup> An in ŋokŋin ondedagen sumumuŋpiŋ enenogat inimagesetgatnaŋ ŋep Kawawaŋgat sakamaŋ ma kwitnaŋ mamsokbein. Ma imbi inimagesetgatnaŋ ŋep angat kwitnaŋ mamsokbein. <sup>8</sup> Neŋ kekok zeyap enenogat Kawawaŋaŋ an kukŋaŋgat mti anmagengatnaŋ imbi mge. Imbimagengatnan an ku mge. <sup>9</sup> Kawawaŋaŋ an imbiyepmti ku mimiŋaŋ. Egaŋ imbi angapmti mimiŋaŋ. <sup>10</sup> Keyepmti imbi apmaŋgat eksempeinaŋ ondedagen saŋgumaŋ ŋokŋaŋ ambuluti mamezin enenogat ensel ekŋenaŋ taekgip. <sup>11</sup> Yaŋgut am Kilais nâmkiŋpemtî maiwaŋ imbiyaŋ apmaŋgat mukulemaŋ bein ma anaŋ kogogak imbiŋaŋgat mukulemaŋ bein. <sup>12</sup> Kawawaŋaŋ

---

\* **11:5:** Ke Zuda am ekŋengalen set kekok matazin. † **11:5:** Imbi set kilen inda aikti ŋokŋin makwanzetindeip ke Zuda am ekŋengalen set kekok matazin.

imbi kukñaḡat anmagengatnaḡ mge keyepmti naman alak imbiyaḡ an mammsokbeip. Kogok keyaḡut eget ma kwitnaḡ kwitnaḡ sambe Kawawaḡmagengatnaḡak sokbewien.

<sup>13</sup> In nâmkijpepenimak, ilinak weyaḡ nâmâtâlit. Inmagengatnaḡ imbiyaḡ dapmelaḡge tunḡuwinanen Kawawaḡgat dundusât nâwe beme egaḡ ḡokñaḡ sâk ambululupinḡ mbe beme keyaḡ pembenāḡ yek. Imbi in ḡokjin ambulubep.

<sup>14</sup> Kogok keyepm in kapi ekme penaḡ bein enenogat kwitnaḡ kwitnaḡ setnaḡ talip in nâip. Neḡ pigok egip an ḡenaḡ ḡokñaḡ sinaḡ teepmaḡ peme tozin beme ke sakam bukñaḡmak. <sup>15</sup> Yaḡut imbi ḡenaḡ ḡoksinaḡ peme teepmaḡ tozin beme nin nâmann keyaḡ mme sepemaḡ dolakñaḡ bein. Enenogat ke Kawawaḡḡaḡ ikñaḡ imbiyaḡ ḡoksinjin teepmaḡ kogok toti kwatan tapme mamayet nâmti beye. <sup>16</sup> Am ḡenaḡ zet kapiyet nâme ḡep ku beme mdândâsât setnaḡ zulutbe beme kapigok nâmbē. Set kapi Kawawaḡgalen dapmelaḡge sambe nin mâti mamnup.

### *Amobotnaḡaḡ tu meu ndandaḡaḡ*

<sup>17</sup> Âpme neḡ tambuḡalem zigok niniyelen ke zemzikat indasowap. Neḡ in set mamip keyet zemesewatindendeyelen yek. Enenogat set in alak kapi tapmip kapiyaḡ indamukulem mme Amobotnaḡ Kilais nâmkatik bempemti zetnaḡ gawepumti yek. Keyaḡ naman mme in Amobotnaḡ nâmkatik bemti zetnaḡ gawepupuyelen mme naman bakñaḡ betobep. <sup>18</sup> Kukñaḡgat neḡ pigok zesowap. Neḡ zet pigok nâwan in tambuḡalemgat ke ondaktiḡgut tunḡuwinangatnaḡ

am notnaŋaŋ zet mopmtot mti kalalaŋ mawen. Am notnaŋ zapat kegok mnawien ke naman nâma bugan penaŋ penaŋnok beye. <sup>19</sup> Yangut inmagengatnaŋ maŋge denenaŋ set pembedaset kwitnaŋ kwitnaŋ tapmip ke ŋep ekmâtâtâtgalen ke kapigok, ekŋenaŋ maŋge temaŋ katikindemti kalaŋti sokbemkawaŋ bembeyelen mamip. <sup>20</sup> In ondekti tambuŋalem nsât koti tu meu bumti koti nolineneyet zikat gatnan mti tatnip. Kegok ke in tapmip. <sup>21</sup> In sambeyaŋ meuŋin timkoti nolineyeyet damuŋ tatapiŋ sakwep manip. Ŋenaŋ igak kambak balaŋ mmepme ŋenaŋ meuyet mamimti melip ma notnaŋaŋ wain omba penaŋ nimti keŋ kileŋ mamip. <sup>22</sup> In tu meu etaŋ nsât nâmti ilinaŋgat mkaŋinan manimambep enenogat in Kawawaŋgalen dapmelange ondegawen in ku maeksemendeip ma am bekopsat ekŋen sakambuk maindaip. Neŋ keyepmti ingat zigok zenezeyelen ke ku nâmâtâlâp. Keyepmti neŋ keyet oloŋen ŋep ku mimiyelen.

<sup>23</sup> Neŋ zet kapigok Amobotnaŋmagen tiwawen ke in zemâtâtindama delaŋ zeye. Tambuyet Amobotnaŋ Zisas Zudasiyaŋ Zuda am ekŋengalen an ŋenaŋ ekŋenmagen zemkuye kan keyet Amobotnaŋaŋ nupmamaŋ mti <sup>24</sup> keyet Kawawaŋgat wisikŋ zemutumti zeye, “Nupmamaŋ kapi nanaŋgat sekŋnok ingat yomin katikpepeyelen indawap. Nimbep kataŋ nâgât otnâpeŋ mamambep.” <sup>25</sup> Meu nime delaŋ zeme wain okop sakam kegogak mtati pigok zeye, “Wain kapi nanaŋgat sipmnok. Tâtâ Alakŋaŋ sipmnaŋ miap. Nimbep kataŋ nâgât otnâpeŋ

mamambep.” <sup>26</sup> Kok keyepm in nupmaman ma wain kapi manimambep katan Amobotnanggat gakikinanggat zapatnan zemkawan bepen manepeme iknang kobe.

<sup>27</sup> Keyepmti an nenang set pembenang ku mâti nupmaman ma wain nti keeset egan Amobotnangalen sip sesumbangan ku eksempepgapmti yom mip. <sup>28</sup> Keyepmti am nen nupmaman ma wain nsâpmti iknanggat kenanggat yanang nâmâtâti nimbe. <sup>29</sup> Nen egan Amobotnanggat seknan keyet yanang ku nâmâtâti nupmaman ma wain nimbe beme Amobotnangan zemkuwe. <sup>30</sup> In notnan set pembenang ku mâti Amobotnangalen tu meu manipgapmti zawat suksuk ma sek sindem matip ma notnan gakiwien. <sup>31</sup> Yangut nngat yanang ekmâtâti nimbanup beme Amobotnangan ku zemdowe. <sup>32</sup> Yangut Amobotnangan yanang msokbempti manndamusuwezin kogok mme egan am Kilais ku nâmkinjpeip eknen nsakwep ku zemdolan zemdowe.

<sup>33</sup> Keyepmti Kilaismagen notnne, in nupman ma wain nsâti am sambe ilinsakwep ondekme delan zemenngut yanbempti manimambep. <sup>34</sup> Nenang meunanggat penang mbe beme egan meunang mkanan nimtingut bam kobe. Mneti ondedak ke myungunepeme Kawawangan zemkuwe.

Zet notnan notnan ke nen kotingut zemâtâtindawap.

*Emetak Tenaj taolet yanaj yanaj mulup-  
mangat mandain*

<sup>1</sup> Kilaismagen notnne, neŋ Emetak Tenaj mulupmaŋ am nâmkîŋpepeŋinmak ekŋengat ma-  
maŋinan zigok mamm yanŋwesi keyelen dop-  
maŋ gilik zesowap. Neŋ in kapi weyaŋti  
nâmâtâtâgalen nâyap. <sup>2</sup> Ilin nâmtalip in itnaŋaŋ  
tambusosop keŋan mambienen nopiom yanaj  
yanaj mamaŋinpiŋ pedondom indamti masese-  
watindemtemien. <sup>3</sup> Keyepm neŋ nembetnaŋ  
pigok diindosowap: An ŋen ek Kawawaŋgalen  
Emetak Tenaj keŋaŋ m eleŋ beleŋ beme egaŋ  
pigok ku zenak, “Zisas geŋ zemtalat geyap.” Ma  
ŋen Emetak Tenaj keŋaŋ ku m eleŋ beleŋ beme  
egaŋ pigok ku zenak, “Zisas ek Amobotnaŋ.”

<sup>4</sup> Emetak Tenaj taolet yanaj yanaj am  
nâmkîŋpepeŋinmak sambe ke mulupmangat  
winde indame mamip. Yanŋut Emetak Teŋ  
ikŋaŋ kwep keyaŋak am nâmkîŋpepeŋinmak  
taolet sambe ke maindain. <sup>5</sup> Amobotnaŋgalen  
mulup kwep kwep am nâmkîŋpepeŋinmak  
sambeyaŋ mimiyeŋen maindain. Yanŋut  
Amobotnaŋ ikŋaŋ kwep keyaŋak ikŋaŋgalen  
am sambe mukulem mimiyeŋen mulup ke  
maindain. <sup>6</sup> Ma Kawawaŋaŋ mulup mimiyeŋen  
am nâmkîŋpepeŋinmak kwep kwep winde sepem  
igak igak maindain. Yanŋut Kawawaŋ ikŋaŋ  
kwep keyaŋak ikŋaŋgalen am sambe mulup  
mimiyeŋet winde maindain.

<sup>7</sup> Emetak Tenaj am nâmkîŋpepeŋinmak  
taolet sakam ikŋak ikŋak maindainen keyaŋ  
msokbeinen Emetak Tenaj am ŋeniyet

tunġuwinan mulupmaġ penaj tapm. Kogok mimindainen am sambeyaj mukulem titiyet nâmti mamm. <sup>8</sup> Emetak Teġaj nânâ dolakġaj nânâyelen taolet same eġaj am Kawawaġaj mama mamayelen nâmtikġaj mam ke manzemkawaġ bemindain. Emetak Teġ ikġaj kwep keyaġak am nâmkijpepeġinmak taolet sambe ke maindain. <sup>9</sup> Nġen Emetak Teġ ikġaj kwep keyaġak taolet mpeme Kilaismagen nâmkijpepeġaj kaliġaj penaj tatagalen masain. Ma nġen ek Emetak Teġ ikġaj kwep keyaġak am zawat mme alik bembeyelen taolet masain. <sup>10</sup> Ma nġen Emetak Teġ ikġaj menok notnaġ mimiyet taolet masain. Ma nġen ek Emetak Teġaj buġam zapat same timti dapmelange ondedaġenjan mandiindon. Ma nġen ek taolet mpeme winde ke Kawawaġmagengatnaġ makozin ma we bekaġajmagengatnaġ ke maekmâtâzin. Ma nġen taolet zet mamanamaġset zemkawaġ bembeyet masain ma nġen ek taolet zet mamanamaġset zeme nâmti am zelinaset gilik zemindandayet masain. <sup>11</sup> Emetak Teġ ikġaj kwep keyaġak taolet sambe kapi mulup sambeyet winde am kwep kwep maindain. Mti Emetak Teġ ikġajġat keġajġatnaġ am nâmkijpepeġinmak sambe taolet sepem ikġak ikġak makalaġ kumti indain.

*Sekġ butnaġ butnaġ ekġen muluwin ikġak ikġak yaġgut sek ek kwewetaġ*

<sup>12</sup> Am nin sekġ kwewetaġ yaġgut sekġ butnaġ butnaġ ekġen sambeyaj muluwin ikġak ikġak penaj mamiwaġgut ekġen keyaġ ondekti sek kwepġat mulup mamip. Kilaismagen sepem

kebonjak tazin. Nin am sambeyangut manje kwep benup ma manje ke Kilaisiyelen sekñan. <sup>13</sup> Notnan nin Zuda am ma notnan Zuda manjeen ku sokbembenan ma notnan sisilin kuku an etan ma notnan lala bubuk etan mamayet Emetak Ten kwep keyan nin sambe sek kwep kekok mamayet temakwep ondekndeye.

<sup>14</sup> Âpme sekñ ikñan ke butnan kwep etan yek; sambe penan. <sup>15</sup> Keyepmti setnnañ kapigok ñep ku zenzeyelen, “Neñ bet yek keyepmti neñ sekmagen etimti nanak etan mepmamambap,” kekok ñep ku zenak. <sup>16</sup> Ma wagan kapigok ñep ku zenzeyelen, “Neñ zikat yek keyepmti neñ sekmagen etimti nenak etan mepmamambap,” kekok ñep ku zenak. <sup>17</sup> Sekñnan zikat etan bemâdak ze zigoset zet nânak? Ma wak etan tamâtnak ze zigoset kambe sesik nânak? <sup>18</sup> Sekñ ikñan tazin kapigok Kawawanan ikñanggat kenangalak butnan butnan ikñan nânge nogak beye. <sup>19</sup> Sekñ butnan sambe sepeman kwewetan ze sekñ kapiyet sekñ ku zewanek. <sup>20</sup> Sek ikñan tazin kapigok butnan sambe yangut sekñ penan kwep.

<sup>21</sup> Âpme zikalan betgat pigok ñep ku zenak, “Neñ gepin ñep mambap.” Ma ñokñnan setn zutgat pigok ñep ku zenak, “Neñ itpin ñep mambap.” <sup>22</sup> Kogogapm sekñ butnan notnan nâmindema winderinpin mambeip; ekñenpin beme sekñnan dolakñan penan ku tadak. <sup>23</sup> Nin sekñ butnan nâmindemann tototnan mambein ekñen indikdamuñ dolakñan mamnup ma notnan sakambukñanmak maangalanindenup. <sup>24</sup> Sekñ butnan notnan sakaman pbenan ekñenan sosok



matamâlip. Kawawaŋaŋ seŋ mmeti sek butnaŋ notnaŋ tototnaŋ yangut mulup temaŋ indaye. <sup>25</sup> Ke seŋ butnaŋ ekŋenaŋ epeemti kileŋ mekokopiŋ sisiliŋ mulup sakam kwep penaŋ mimiyet nâmti keŋok mge. <sup>26</sup> Keyepmti seŋ butnaŋ kemak ŋenaŋ sindem nâme seŋ sambe ekŋen sindem mambein etaŋ. Ma ŋenaŋ zemesewatpeme ekŋen sambe ekŋenaŋ kemak oloŋen mammâlip.

<sup>27</sup> Inmagen keŋok bein. In sambeyaŋ temakwep Kilaisiyet seŋŋaŋ beip. Ma in kwep kwewaŋ sek keyet butnaŋ butnaŋ bep. <sup>28</sup> Kawawaŋ egaŋ amŋene nâmkiŋpepemak maŋge ninmagen am kapigok taolet mimindamti indem mege.

Ŋenaŋ an ombemindemti buŋam zapat zemkawaŋ bembeyelen indeye,  
 keyetnan golaŋ zenze an,  
 keyetnan am zikat indanda,  
 keyetnan am menok mimiyelen,  
 ma am zawat sek sindemak  
 weyaŋindendeyelen,  
 keyetnan am mukulem mimi  
 ma am damuŋ  
 ma zet mamanan aŋ iŋŋak iŋŋak zenzeyet am indaye.

<sup>29</sup> Kawawaŋaŋ am sambe ombemindemti buŋam zapat zemkawaŋ bembeyelen an etaŋ taolet ku indaye. Ma am sambe golaŋ zenze an bembeyet taolet ku indaye. Ma am sambe an zikat indandeyelen taolet etaŋ ku indaye. Ma am sambe menok yaŋaŋ yaŋaŋ mimiyelen taolet etaŋ ku indaye. <sup>30</sup> Ma am sambe zawat sek sindemak weyaŋindendeyelen taolet ku indaye. Ma an zet

mamanamaset zenze keyelen taolet etaŋ ku indaye. Ma am zelinaset zemguluk gilik mimiyelen taolet an etaŋ ku indaye.

<sup>31</sup> Yaŋgut neŋ in Emetak Tenmagengatnaŋ taolet mobotnaŋ ke indandayelen omba penaŋ indembewe. Keyaŋ indamukulem mme mulup dolak dolakŋaŋ dapmelangeyet tunguwinan ŋep mimiyelen. Kegogapm neŋ set pembenanŋ ŋen kapigok zikat indasowap.

## 13

### *Am nâmkîŋpepeŋinmagalen gogot*

<sup>1</sup> Âpme neŋ taolet ŋen zet mamanananzenzeyet nanaŋaŋ ma ensel ekŋengalen zet ŋep zeyap yaŋgut am ŋengat gogot ku miap beme neŋ belo ma gwesim nembonŋ kwisakŋ yaŋepiŋ nemba isikŋaŋaŋ kunak kebonŋ. <sup>2</sup> Ma neŋ Kawawaŋgalen buŋam zapat timti dapmelange ondedageŋinan diindowak ma neŋ Kawawaŋaŋ kwitnaŋ kwitnaŋ bam mme sokbembeyelen enzilim tazin ke nâwak, ma neŋ am Kawawaŋaŋ mama mamayelen nâmtikŋaŋ mam ke ŋep manzemkawaŋ bemindama delaŋ penak ma nâmkîŋpepe kaliŋaŋ name Kawawaŋ dundum sama winde name kalaŋ zempema piyetnaŋ kainde medak yaŋgut neŋ am ŋengat gogot ku mimindowak beme neŋ belakŋaŋ penaŋ beap. <sup>3</sup> Âpme neŋ milawatn kalop bemti am tototnaŋ ekŋen indawak ma sekŋ Kawawaŋgalen Zet Zapat Dolakŋaŋ Penanŋapm ketalasimindama kumti buwiek yaŋgut am ŋengat gogot ku mbak beme neŋ belakŋaŋ penaŋ beap.

<sup>4</sup> Am keñinanen gogolan misik tazin ekñenan sindem indame dopman ku mutumindaip ma sindem indame keyet peme weme dopman pembenan mamimindaip, ma eyak ku mamip ma ilinangat mamponganin ku kumti kwilin ku mamwalip. <sup>5</sup> Ekñenan am nolineyet sekñeyak ku mamin indaip; ekñengat nâme mobotnan mambeip. Ma ilinangat etan nâme ku mamolip ma ñenzinziñ sakwep ku mamip ma myungum indame keyet nâmbekambembe teepman ku mamm maip. <sup>6</sup> Am gogolinmagan bekananjan palakjan bemepme keyet nâme pembenan ku mambein yangut ekñenan mama mimi dolakjanjan palakjan bemebeyet nâme pembenan mambein. <sup>7</sup> Ekñenan nukjan sepem ikñak ikñak ke nâme betetnan beme mapuip, ma am ñen ekti ekñengat ku manâmbemindeip. Ekñenan am notnanjan mamanin gilik zeme pembenanen kokogat webepen mamaip. Nukjan sambe sokbemindame ekñenan katikjan bemti matalip.

<sup>8</sup> Gogot ke delan zenzenepin. Âpme Emetak Tengalen taolet golan zenze an kapi delan zenzenanmak ma Emetak Tengalen taolet zet mamanamaset zenze kapi kegogak delan zenzenanmak. Ma Emetak Tengalen taoletnan kwitnan yanjan nâmâtâtât kapi kegogak delan zenzenanmak. <sup>9</sup> Enenogat alak pigogat Kawawangalen mama butnan etan nâmti ke dapmelange ondedakginan bunam zapat butnan etan ke mandiindonuwan <sup>10</sup> bamgat Zisasiyan iknan kopmegulak taolet ekñen kapi delan zeme

nin kwitnaŋ kwitnaŋgat yaŋaŋ nâmâtâbanup enenogat Kawawaŋ ikŋaŋmak tapmann kegok sokbewe.

<sup>11</sup> Neŋ nembra isikŋaŋ mambanen zet ma man ma otnânân nembra isisigaŋ mamip keyet kataŋ otnâm̄ti mammteman. Yaŋgut maneti an temaŋ bewan kan keyet nembra ekŋengalen nânâ ke pema temege. <sup>12</sup> Alak pigogak Kawawaŋgalen yaŋaŋ isikŋaŋ bugan nâmâtâtŋnup yaŋgut bamgat Zisasmak sokŋaŋ tati zikalaŋ dopmaŋ ek dopmaŋ ek mbanup. Alak kapiyet Kawawaŋgat yaŋaŋ butnaŋ butnaŋ etaŋ maeknâmâtâtŋnup yaŋ kan keyet egat yaŋaŋ nâmâtâpmann delaŋ zewe. Kawawaŋaŋ nâgât yaŋaŋ nâme delaŋ manzein sepem keboŋ neŋ egat yaŋaŋ eknâm mman delaŋ zemâpbe.

<sup>13</sup> Alak pigogak mama mimi kapigok wem ndame tapmanup; Nâmkiŋpepemak mama ma Zisasiyet kokotnaŋgat webemti mama ma gogot mti mama. Ekŋen tuk kegogaŋ talip, yaŋgut ekŋen kemagengatnaŋ gogot palen mama keyaŋ egat zut ke sebemitdemti dolakŋaŋ penaŋ bein.

## 14

*Emetak Teŋgalen taolet kapiyaŋ ŋenaŋ penaŋ bein*

<sup>1</sup> Kogogapm in am sambe gogot mimindewep. Mti Emetak Teŋmagengatnaŋ taolet kapi titiyelen keŋinan omba indembewe: Kawawaŋmagengatnaŋ buŋam zet timti dapmelange ondedagen diindondo mulup ke nâme mobotnaŋ bewe. <sup>2</sup> Am ŋenaŋ zet mamanamaset manzein egaŋ amgat yek;

Kawawaŋgat etaŋ manzein ma keyaŋ ek etaŋ mamukulem mpein. Egaŋ Emetak Tenjaŋ zet ke zenzeyet keŋaŋ m eleŋ beleŋ mpeme manzein mme am ekŋenaŋ yaŋaŋ ku manâmâtâlîp. <sup>3</sup> Keyaŋgut am ŋenaŋ Kawawaŋgalen buŋam zapat manzemkawaŋ bein egaŋ am zet ke diindome keyaŋ nâmkiŋpepeŋin bandim mamindein ma mamaŋin gwatnaŋ mamin ma keŋin mamkipmaŋ bein. <sup>4</sup> Zet mamanamaset manzein egaŋ ikŋaŋgat keŋaŋ mambutein yaŋgut Kawawaŋgalen buŋam zapat manzein egaŋ am nâmkiŋpepeŋinmak mgwatnaŋ mam indein.

<sup>5</sup> In zet mamanamaset zeme neŋ ingat nâma ŋep penaŋ bein, yaŋgut naman Kawawaŋgalen zet zapat zemkawaŋ bembeyelen an beme neŋ keboŋ keyet nâma pembenanŋ penaŋ mambein. Kawawaŋgalen zet zapat manzemkawaŋ bein egaŋ am zet mamanamaset manzeip ekŋen bugan silim indem talip. Yaŋgut ekŋenaŋ zet mamanamaset zem meti keyet yaŋaŋ am nâmkiŋpepemak zemâtâtindandayelen an ŋen tazin beme dapmelenge ekŋenmagen mukulem ŋep omba penaŋ sokbenak.

<sup>6</sup> Kilaismagen notnne, neŋ inmagen koti zet mamanamaset zewak beme nâlen zet mamanamaŋ keyaŋ in zigok indamukulem mindenak? Inmagen kopmambak mene ze Kawawaŋmagengatnaŋ nânâ zet katnaŋ mzikat nayeen ke ma Kawawaŋgalen nânâ dolak dolakŋaŋ ma Kawawaŋgalen buŋam zapat zemkawaŋ bemindawak ma Kawawaŋ nâmkiŋpemmamayelen zemâtâtât notnaŋ in

kot zemzikat indandayelen keboŋ timti kobak. <sup>7</sup> Gwasim ma gita kulele belak etaŋ kuma kwitnaŋ kuwaŋgut silik ŋandaŋaŋ ku mâti kun beme amnaŋ yaŋaŋ ŋep ku nâmâtâtâgalen. <sup>8</sup> Ma lumun ondedagat makumbuiwen katnaŋ ku kumbuyo beme kwilekiyet takup ke ŋep ku nâmbek. <sup>9</sup> Ma in kegogak zet mamananaset belak kwisak etaŋ takume notnaŋ ekŋenaŋ zigoset zet keyet yaŋaŋ nâmâtâbe. E to zeme met penaŋepiŋ mambein. <sup>10</sup> Msat sambe katanŋ zet sepemaŋ iŋŋak iŋŋak penaŋ wemezin yaŋgut zet zeip ke am maŋge keyelenaŋ ŋep yaŋaŋ zigogat tazeip ke nâyo. <sup>11</sup> Yaŋgut neŋ zet ke ku weyaŋ nâmâtâbap beme zet toŋaŋ egaŋ nâgât nâme kopa penaŋ bewak ma neŋ kegogak egat nâma kopa benak. <sup>12</sup> Âpme inmagen sakam kegogak tazin. Emetak Tenŋalen taolet inmagen sokbembeyelen manzeip e ŋep, yaŋgut in taolet ke timti am nâmkiŋpepemak indamukulem mimiyyet windenŋaŋ mbep.

<sup>13</sup> Keyepm zet mamananaset animbi zet diindosât mbanik beme Amobotnaŋ dundum samane zedi ke gilik zenze winde game timtati zemti gilik zemindawanik. <sup>14</sup> Neŋ zet mamananaset ondedagen dundusât nâmti dunduyap beme nanaŋgat keŋŋ ma sekŋ mme pâpâyelen talaŋgut yaŋaŋ zigogat miak ke ŋoktikŋnan penaŋ ku alalep. <sup>15</sup> Keyepmti zigok ŋep mimiyyelen? Zet mamananaset ondedagen dunduyap beme keyet yaŋaŋ ŋoktikŋnan sokbeme gilik zemindayap. Mme silik ŋen zet mamananaset ondedagen kuyap beme keyet yaŋaŋ ŋoktikŋnan sokbeme gilik zemindayap. <sup>16</sup> Ma geŋ ondedagen

keñdan zet mamamaset Amobotnaŋgat zem-  
sesewatpemanē, am ekñenaŋ gâlen zet yaŋaŋ ku  
nâip beme ekñenaŋ zigoset gamukulem mti keyet,  
“Ke penaŋ,” zewiek? <sup>17</sup> Geŋ dundundudanēn  
Kawawaŋ zem olim pesât mene mti zet mamana-  
maset dundunak yaŋgut yaŋaŋ ku gilik zenak  
keyaŋ nodi ku mukulem mip.

<sup>18</sup> Neŋ in bugan sebemindemti zet mamana-  
maset zet mamamanaŋ omba penaŋ manzeyap  
keyepmti Kawawaŋgat wisikŋ zemti mandun-  
dusayap. <sup>19</sup> Yaŋgut neŋ dapmelange ondeda-  
gen zet nâm taliwen Kawawaŋgalen buŋam za-  
pat pemkwepmaŋ zema nâme tulun telan be-  
mbeyelen zelinan zema nâyo keyaŋ pembenanŋ.  
Yaŋgut zet mamamaset zemane amnaŋ yaŋaŋ  
ku nâme teepmaŋ zemti mandam mama ke pem-  
benanŋ penaŋ yek.

<sup>20</sup> Kilaismagen notnne, zet zemkwala keyet  
yaŋaŋ eknâmâtât mimiyeleŋ ñoktikŋinanŋ  
okak ekñengalen sepem ku bewē. Bekanaŋ  
mimi ekñenmagensetgut okak maipnok  
mambep, yaŋgut kwitnaŋ kwitnaŋ eknâmâtât  
mimiyeleŋ ñoktikŋinan an temaŋ ekñengalen  
katanŋ bewē. <sup>21</sup> Zii zelen zet ñen kapigok  
kumpepeŋaŋaŋ matazin. Amobotnaŋaŋ zein,

“Neŋ am mamamanaŋ ma zelin igak ñen  
zemindema ekñenaŋ koti nenaŋgalen  
am maŋgemagen kobewen nâlen  
ñenzinziŋgalen piliŋnok keyaŋgut nâlen  
amnaŋ ekñenaŋ keŋin kaliŋaŋ bewē mme  
yomengatnaŋ gilik zem kwakwagalen ku  
nâmbep.” *(Aizaya 28:11-12; Zii Zet*

*28:49-50)*

<sup>22</sup> Am zelin mamananamamak kobien ke am Kawawaŋgalen zet ku nâmkijpewien ekŋengat piliŋnok nâmindeme kokotnaŋ yaŋgut ke nâmkijpepemak am ekŋengat zapat ku beye. Âpme naman Kawawaŋgalen buŋam zapat zemkawaŋ bembekewaŋ am nâmkijpepeŋinmak ekŋenmageŋet pembenanŋ masokbein enenogat keyaŋ keŋin mbutemti mamananŋ mgwatnaŋ mamm.

<sup>23</sup> Kogogapmti am nâmkijpepemak sambeyanŋ ondek tati zet mamananamaset tazeme am nâmkijpepeŋinpiŋ ekŋenaŋ Emetak Teŋgalen taoletgat yaŋanŋ ku nâiwaŋ kot indikti pigok zewep, “Am kapi keŋin kileŋ tabein.” <sup>24</sup> Yaŋgut an Kawawaŋgalen buŋam zapat tazemkawaŋ beme am nâmkijpepeŋinpiŋ ekŋenaŋ Emetak Teŋgalen taoletgat yaŋanŋ ku nâiwaŋgut koti zet ke nâme keyaŋ mama mimiŋin mgasik ke zikat indame ekti yayaŋ omba mbep. <sup>25</sup> Âpme keŋanen kwitnaŋ kwitnaŋ bekananŋ maenzilim tazin ke sokbemkawaŋ beme msalen tot kusum tati Kawawaŋ zemsesewatpemti pigok zewe, “Kawawaŋ inmak penaŋ mamain.”

*Silik dundundu msât setnanen mâti mbep*

<sup>26</sup> Keyepm Kilaismagen notnne, in zigok penaŋ mbep? In ondebep kan keyet ŋenaŋ silik yaŋbeme kuwep ma ŋenaŋ Kawawaŋgalen zetgat yaŋanŋ zemzikat indam mbe ma ŋenaŋ Kawawaŋmagengatnaŋ nânâ zet katnaŋ muzikat saye ke zemsokbewe ma ŋenaŋ zet mamanamaset zewe ma ŋenaŋ zet keyet yaŋanŋ gilik zewe.



In kwitnaŋ kwitnaŋ silik dundunduninan mbep keyaŋ am nâmkînpepeŋin bandim mme katikŋaŋ bemtabe. <sup>27</sup> Zet mamananamaset zet zesâti sambeyaŋ yek. Am zut tuk mee kekok etaŋaŋ mbep. Yaŋgut kwewaŋ zeme kwewaŋ zeme kekok mme ŋenaŋ yaŋaŋ gilik zem zeme amnaŋ nâmbep. <sup>28</sup> An zet gilik zenze timabep beme ondedak keyet keŋaŋ zet mamananan ku zewep. Egaŋ zesât nâmbep beme ikŋak etaŋ ma Kawawaŋgat zewe.

<sup>29</sup> Ma Kawawaŋgalen buŋam zapaŋaŋ zenzeyelen Emetak Teŋaŋ taolet indandaŋaŋ ekŋenmagangaŋaŋ an zut ma tuk etaŋaŋ zewep. Âpme am notaŋaŋ ekŋenaŋ zet ke yaŋaŋ penaŋ opemnâmbep. <sup>30</sup> An ŋen Emetak Teŋaŋ Kawawaŋmagangaŋaŋ nânâ zet katnaŋ mzikat same an keyaŋ zesât wabe beme an zet tazein keyaŋ notaŋaŋ zet zesât wazin ke ekti totabe. <sup>31</sup> Kawawaŋgalen zet zapaŋaŋ zemkawaŋ besâti ŋepgat zewep. Yaŋgut ŋenaŋ zeme nâm ŋenaŋ zeme nâm kekok mme am nâmkînpepeŋinmak ekŋenaŋ nâme keyaŋ keŋin mbuteme keŋin kikipmak mambep. <sup>32</sup> Kawawaŋgalen buŋam zapaŋ zemkawaŋ bembe an ekŋenaŋ zet zigok zigok zesenuŋ e yaŋaŋ ilinagak omkalili mulup mbep. <sup>33</sup> Kawawaŋ ek myuŋguŋgu keyet ŋotekŋaŋ yek. Ek sewaŋaŋ mama keyelen Kawawaŋ.

An zikat indanda notaŋaŋaŋ dapmelange ekŋengat tuŋguwinan zet kapi mamzikat indaŋ, <sup>34</sup> “Ondedeginan imbi ekŋenaŋ zet zenzepiŋ belak tabep. Imbi ekŋenaŋ kekok mti tototaŋ mambep. Nin etaŋ ku zenup; zii zelen kekok

zenzenaŋ tazin. <sup>35</sup> Kwileki ŋen nânâyelen nâmti mkaŋinaŋ daenen awinemak zenâ zenâ mbep. Mneti imbiŋineyaŋ dapmelenge ondedagen zet zeme sakambukŋaŋmak bewe.” <sup>36</sup> Zet ke nâma yeyenŋalen penaŋ bein. Kawawaŋgalen zet inmagen etaŋ sokbembenŋaŋ ma in ilinak etaŋ nâmamayet zet keyaŋ koindaige? Yek penaŋ. <sup>37</sup> Inmagengatnaŋ ŋenaŋ iŋŋaŋgat nâme golaŋ zenze an ma Emetak Tenmak mayap bewe beme egaŋ zet kumindayap kapiyet nâme Amobotnaŋgalen zemkatik beme bewe. <sup>38</sup> An ŋenaŋ kegok ku nâwe beme, in eget nâme Kawawaŋgalen zet zapatnaŋ zenze an penaŋ ku bewe mti naman egalen zet nânâpiŋ.

<sup>39</sup> Keyepm Kilaismagen notnne, kapigok kweggut nâseip. In Emetak Tenŋalen taolet Kawawaŋgalen buŋam zapatnaŋ zemkawaŋ bembeyelengut windenaŋ mbep ma taolet ŋen zet mamananaset zenze ke ku bekekbep. <sup>40</sup> Yaŋgut in silik dundundunŋin ke weyaŋti ekdamuŋ mti esemteŋ mbep.

## 15

### *Zisasiyaŋ gakikiengatnaŋ gilik zem wawanaŋgalen zetnaŋ*

<sup>1</sup> Kilaismagen notnne, pi ewe Kawawaŋgalen Zet Zapat Dolakŋaŋ Penaŋ timkot diindoma nâmkinpemti timaip ke ewe windenaŋ beŋ atam kitik mtalip. <sup>2</sup> Kawawaŋgalen Zet Zapat Dolakŋaŋ Penaŋ zemzikat indam mban keyet nâmkinpeme keyaŋ indaŋgalaŋindeye. Keyet Kawawaŋgalen

zet katnañ ke weyañti atam kitik mti mamambep. Kegok ku mbep beme ingalen nâmkinpepe belakñañ penañ bewe.

<sup>3</sup> Zet ñotekñañ mobotnañ neñ kukñañgat zemâtâtñanañañ keyegak inmagen koti diindowanen kapigok: Kilais ek eweñañ Kawawañgalen Zet Itñañanen zemâtâtpepeñañ keyet katanñ ningalen yommgat dopmañ gakiye.

<sup>4</sup> Mti Kawawañgalen Zet Itñañanen zenzeñañ keyet katanñ kumti met am sumen bewienañ kasup tuk etañ tati naman gakikiengatnañ gilik zemti wage.

<sup>5</sup> Gakikiengatnañ wati ñeñañ Pita sokbemsaye eyetnañ nembrañane sokbemindaye.

<sup>6</sup> Eyetnañ zet zapat zenze anene 500 sebempein kegogak sokbemindame ekmâbien. Am ekñen ke ekbien ke notnañ gakiwien ma notnañ ekñen ewe tapmaip.

<sup>7</sup> Eyetnañ Zekop sokbemsamti met nembrañane ekñen ilindiñ sokbemindaye.

<sup>8</sup> Bam penañ neñmagen pempetuk sokbemname ekban. Neñ ekmak ku mamañañañgut kegok sokbemnamti an zet tim palakñañ bembeyet an bekanañ neñ nakumtetiye.

<sup>9</sup> Neñ an Kawawañgalen buñam zapat zempalakñañ bembeyet ombemindemti indakumtetiye ekñen kemagengatnañ neñ toweweñañ penañ. Tipman baenen neñ Kawawañgalen manñe indom walet mamteman keyepmti Kawawañgalen buñam zapat zempalakñañ bembeyet ombemnemti nakumtetitiñañ kwit ke name ñep penañ ku mambein.

<sup>10</sup> Yanñgut neñ alak Kawawañgalen buñam zapat zempalakñañ bembeyet

ombemnemti nakumtetitiŋaŋ kwit ke timti talap ke pe Kawawaŋgalen keŋ taoletnaŋgapmti tiwan. Âpme Kawawaŋgalen keŋ taolet ke penaŋepiŋ ku beye yek penaŋ. Neŋ mulup mban keyaŋ Kawawaŋgalen buŋam zapat zempalakŋaŋ bembe ombemindemti indakumtetiye notne silim indemti omba penaŋ mban. Kegok mban ke nanak ku mban; Kawawaŋaŋ keŋ taolet mnamti napmukulem mme mban. <sup>11</sup> Âpme neŋ ma ekŋenaŋ buŋam zapat kwep keyegak mkoti zempalakŋaŋ bemann in zet ke nâmkŋipemti maip.

*Zisas gakikiengatnan wageyepmti nin kegogak gakikiengatnaŋ wapmâbanup*

<sup>12</sup> Nin Kilais gakikiengatnaŋ wawatnaŋgalen zapatnaŋ diindomangut inmagen notnaŋaŋ gakikiengatnan wawat ku tazin manzeip. <sup>13</sup> Ekŋenaŋ zet tazeip ke penaŋ benak beme, Kilaisiyaŋ gakikiengatnan wage zet ke kegogak penaŋ yek. <sup>14</sup> Kilais ku watnak ze Kawawaŋgalen Zet Zapat Dolakŋaŋ Penaŋ zemkawaŋ bambenn ma ingat nâmkŋipepeŋin penaŋepiŋ bemâtnak. <sup>15</sup> Âpme nin Kawawaŋgat zewenn egaŋ Kilais gakikiengatnaŋ mme wage. Naman in gakikiengatnaŋ wawat ku tazin zewiegen nin Kawawaŋgalen zet zapat zemyuŋguŋgu an bewenek. <sup>16</sup> Am gakikiengatnaŋ ku mawalip kegok zewanup beme nin Kilaisiyet kegogak gakikiengatnan wage ku zewanup. <sup>17</sup> Kilais gakikiengatnan ku watnak ze nâmkŋipepeŋin belakŋaŋ beme, yomin asesekgalen selin ŋen ku tatindanak. <sup>18</sup> Ma am notnaŋ Kilais nâmkŋipemti

gakiwien eknen kogogak waleletgalen zapat bewiek. <sup>19</sup> Nin Kilais manâmkinpenup ke msalen mama tapmanup kapiyelen kwitnañ kwitnañ etañ benak beme nâmkinpepe keboñ ke kembenañmak.

<sup>20</sup> Yanğut kegok yek. Kilais ek penañ gakikiengatnañ am gakikiñañ ñenañ bemindamti wageyañ mamain. <sup>21</sup> An ñenañ yanbem gakiyeyepmti nin mañgakimann delañ zein. Yanğut an ñenañ kegogak yanbem wageyepm nin wabanup. <sup>22</sup> Nin Adamgat sip butnañ keyepmti mañgakimann delañ zein. Sepem kegogak Kilaismak tususun tazin keyepmti gakikiengatnañ wapmâbanup. <sup>23</sup> Gakikiengatnañ wawat ke setnañ kapigok penañ sokbesâpm: Kilais ek ilak Bipmañ Kawawañañ mme wage. Âpme Zisas kosâpm kan keyet egalen amñaneyañ kegogak wapmâbep. <sup>24</sup> Kawawañañ kululuñ ma msat kapi aseksâpm, kan keyet Zisasiyañ msatgalen amobotnañin sambe ma Sadangalen mulup anene ma winde sakam ikñak ikñak timtot indemti egañ ikñak etañ Amobotnañin tabe. Ke ilak Kawawañgalen zemâtâtât katnanen mama ke sokbeme mtati Bipmañ same Kawawañañ damuñ mbe. <sup>25</sup> Kan keyet Kawawañañ kasañene sambe timtot indeme setnañ kandenañ tamâpme Nemunañ nâmpeme kwitnañ kwitnañ sambeyet Amobotnañin tabe. <sup>26</sup> Kawawañañ an kasa notnañ mtot indem metingut gakiki windenañ bekegogak mtot pewe. <sup>27</sup> Kawawañgalen Zet Itnañañ pigok zemkawañ bembenañ,  
 “Kawawañañ am ma kwitnañ kwitnañ sambe Ki-

laisiyet kandenan manje bempewe.” (*Sam 8:6*)

Zet ke Kawawanḡat eyo ku zenzenḡan enenogat Eḡan am ma kwitnanḡ kwitnanḡ sambe Kilaisiyet kandenan manje bemindewe. <sup>28</sup> Kawawanḡan am ma kwitnanḡ kwitnanḡ sambe Kilaisiyet kandenan yalonḡpemtḡ Kilais naman ikḡḡanḡat kandenan pewe. Mti Kawawanḡanḡ ikḡḡanḡ Kilais ma am ma kwitnanḡ kwitnanḡ damuḡ mme delanḡ zewe.

<sup>29</sup> Gakikiengatnanḡ wawat keyet zemkot-netipeya ke ewe tusum zesowap. Kawawanḡalen buḡam zapat zemkawanḡ bembe an notnne ekḡḡen sekḡḡin ketalasimti am nāmkḡḡḡpepepiḡ ekḡḡenmagen buḡam zapat timet diindome maindome gakip. Gakikiengatnanḡ wawat ku tazin beme eneyet ekḡḡenanḡ kegok mamip?

<sup>30</sup> Āpme nin kegogak, kwilekiyet kwitnanḡ kwitnanḡ ndawalelegalen mme nāpemtḡ set keyegak mamātnup? <sup>31</sup> Kilaismagen notnne, neḡ Amobotnanḡḡ Zisas Kilais ekgapmtḡ ingat keḡ oloḡḡen mambein. Zet kapi penaḡ sukwep diindoyap. Neḡ kasup katanḡ nukḡḡanḡ sambeyanḡ naminzilime gakikiyelen etanḡ mamkwalap.

<sup>32</sup> Neḡ Epesa mkaen an soḡḡom kukḡḡanḡbeḡnok ekḡḡenmak auwan. Nukḡḡanḡ tiwan keyet penaḡanḡ kwileki tiwap? Gakikiengatnanḡ wawat ku tazin beme neḡ kapigok zema ḡep besem,

“Senḡen mene gakiwanupgat alak tu meu akuman kwaopme nim wianḡwianḡ temanḡ mne.” (*Aizaya 22:13*)

<sup>33</sup> Am mama mimiḡḡin bekananḡ ekḡḡenanḡ zet kelakḡḡanḡ mti indatetim mebep beme ingalen mama mimi dolakḡḡanḡ ke mme bekananḡ bewe. <sup>34</sup> In yom

mamip ke katikpeit. Mti eksemti mamambep. In-magen notnañan Kawawañgat yañan dolakñan ku nâmâtâlíp ke sakambukñanmak.

*Gakikiengatnan sek alakñan timti wabanup*

<sup>35</sup> Notnan ekñenan kapigok mene yañkwesiwiek, “Gakikiñan ekñenan zigok mti wabep ma sek sepemin zibonmak wabep?”

<sup>36</sup> Yañkwesisi ke ku nâmâtâti belak kilen zenzenan. Alik alik katnan notnan maondeip ke mamanan sambume dukñan alakñan makwazin.

<sup>37</sup> In alik alik katnan notnan maondeip ke dukñan mitimti ku maondeip. Nin sanjom ma kawek mee kebon ondemann dukñan ñenan patan zemkwapme bam sinan betnan mamin.

<sup>38</sup> Âpme Kawawañan zemâtâtpeye keyet katan kwati penanan ikñan keyek masokbein ma katnan kegogak sepem ikñak ikñak masokbein.

<sup>39</sup> Sekñanngat yañan kegogak sepeman kwep penan yek. Am ningalen sek sepem ikñak ikñak ma songom ekñen kegogak sek sepemin ikñak ikñak ma age ekñen kegogak sek sepemin ikñak ikñak ma tuyengalen songom ekñen kegok sekñ sepeman ikñak ikñak. <sup>40</sup> Msat kululun palen kwitnan kwitnan tazin ke kululun ekñen sepemin ikñak ikñak ma msalen ekñen kegogak sek sepemin ikñak ikñak. <sup>41</sup> Ma kasup ek busatnanan sepeman ikñak ma eyonga ek kegogak busatnanan sepeman ikñak ma wenzim ekñen kegogak busatnanin sepeman ikñak ikñak.

Wenzim notnan ekñenan nolineyet busatnanin seabemindemti ego gonanmak tapmelip.

<sup>42</sup> Gakikiengatnaŋ wawat ke sepemaŋ kegogak tazin. Msalen bembenaŋ sambumbuyet zapat; wabe ek mama kanzizit mamayet zapat mambe. <sup>43</sup> Msalen bembenaŋ waleletnaŋ ego egoŋaŋpiŋ yaŋgut wabeyen elimiakŋaŋmak ma ego egoŋaŋmak. Msalen bembenaŋ windenepiŋ yaŋgut wabeyen keyaŋ windenŋaŋmak. <sup>44</sup> Bembenaŋ msat sekmak, wabeyen kululuŋ sekmak. Msat sek timti manup kegogak kululuŋ sek timti mambanup. <sup>45</sup> Mama msalen sokbemti manup keyet kapigok zenzenaŋ,

“Kawawaŋaŋ an kukŋaŋgatnaŋ weyaŋti mama saye kwitnaŋ Adam ke.” (*Sokbembe 2:7*)

Âpme mama alakŋaŋ titiyelen ke Kawawaŋaŋ Nemuŋaŋ Zisas gakikiengatnaŋ mme wapme saye keyepmti egaŋ mama alakŋaŋ mama kanzizit ndawe ke egat An bamgatnaŋ Kawawaŋgalen zelaŋ manzemkawaŋ bein keyet kataŋ. <sup>46</sup> Msalengalen sek ŋenaŋ ndame timti msalen kapi mamanup; bamgut kululuŋengalen sek ndame timti kululuŋen mambanup. <sup>47</sup> An ŋenaŋ ek Kawawaŋaŋ msalaŋ mgeyepmti msat kapiyelen an beye. Âpme An bam ek gakikiengatnaŋ wapme kululuŋ sek sasaŋaŋ. <sup>48</sup> An ŋenaŋ msalaŋ mge kegogapm nin egat iŋsokŋene bemti msat sek timti mamanup. Âpme naman An bamgatnaŋ kululuŋ sek timti mamaingapmti nin egalen bembenaŋ kogogak kululuŋ sek timti ekmak mamti mambanup. <sup>49</sup> Âpme an msatgalen sek sakam tiwenn sakam keyet kataŋ maneti bam kululuŋengalen An ikŋaŋgalen sek sakam timti mambanup.



<sup>50</sup> Kilaismagen notnne, neŋ zet ɲen pigok zema nâit. Am msat sekmak ekɲenaŋ Kawawaŋgalen zemâtâtâtgalen katnanen mama keyet keŋan ku mebep. Ma kwitnaŋ kwitnaŋ sambumbuyelen ekɲenaŋ mama kanzizitgat toŋaŋ ku bewep. <sup>51</sup> In weyaŋ tati nâme zet enzililiŋaŋ Kawawaŋaŋ am ɲen ku diindoye ke neŋ dinoyeyepm ingat pigok zema nâit: Nin notnaŋ ku gakimann Kilaisiyaŋ gilik zemkopme nin sambe asekti sepem ɲen bemâbanup. <sup>52</sup> Lumun temaŋ kuwe keyegak nin sepem asekmek ikɲak ɲen bemâbanup. Âpme gakikiŋaŋ ekɲenaŋ sekɲin alakɲaŋ kululuŋengalen kemak wabep ma alik mamananup ningat sekɲ kapi asekmek sepemaŋ ɲen kululuŋengalen zapat bewe. <sup>53</sup> Sekɲ kapi gakimti masambum yek mambein ke mgilik zemti naman ku waleletgalen ke timti mama kanzizit mambe. <sup>54</sup> Kegogapmti sekɲ tetak ku mamayelen pi mgilik zeme tetak mamayelen sokbewe. Kan keyet zet pigok Kawawaŋgalen Zet Itnaŋane Itnaŋanen zenzenaŋ ke penanaŋ sokbewe,

“Mamayaŋ gakiki wilige.”

*(Aizaya 25:8)*

<sup>55</sup> “Kawawaŋaŋ gakiki ilak windenaŋ mtotpein. Gakikiyet windenaŋ ninmagen ewe ku tazin.” *(Hosea 13:14)*

<sup>56</sup> In kapigok nâit, yom ke nombe kukɲaŋbenŋat zetutuŋaŋ nembongapm ndime gakinup. Zii zelaŋ nin an yomtoŋ zemti keyet dopmaŋ manzemndomwaleletgat zapat manndein.

<sup>57</sup> Kwitnaŋ kwitnaŋ ekɲen keyelen windenaŋ ninmagen ɲen ku tim tazin enenogat Zisas Kilaisiyaŋ gakimti windenaŋ tim totindeye keyet

nin Kawawaŋgat wisikŋ manzem mamambanup.  
<sup>58</sup> Kogogapmti Kilaismagen notnne, in katikŋaŋ  
 bemi tabep. Mti Amobotnaŋgalen mulup  
 ŋokkaŋkaŋ kumti winaŋaŋ bemi mbep.  
 Amobotnaŋgalen mulup mbep ke penaŋepiŋ  
 belak penaŋ ku wembe ke nâmkatik bemi mbep.

## 16

*Kawawaŋgalen an imbi towewenaŋ  
 indamukulem mimiyelen tewalaŋ akukuyet  
 diindoye*

<sup>1</sup> Kawawaŋgalen an imbi towewenaŋ ekŋengat  
 mukulem mimiyet mânep akum besât nâmbep  
 beme Galesia am diindowan sekem kegogak  
 mbep. <sup>2</sup> In mânewin tiwep kataŋ butnaŋ  
 ŋen kalaŋti Sonda kataŋ ewenaŋek mkaŋinan  
 mopmangat Kawawaŋgalen tewalaŋ bembeyet  
 wisimti beme tabe kogogapm neŋ ke tisât kopma  
 in nâmkwindendepiŋ âlâkŋak bewep. <sup>3</sup> Neŋ  
 inmagen kot patan zemti an zemindewep ekŋen  
 zemâtâtât papia ŋen kumindama tewalaŋin  
 akum bemberaŋ kemak indame timti Zelusalem  
 mebep. <sup>4</sup> Ma tewalaŋin sambe neŋ nsakwep  
 mebegalennok bewe beme ŋep mebanup.

*Pâlaŋ Kolin ekŋenmagen met indidikgat zet  
 beme mege*

<sup>5</sup> Neŋ Masedonia msat kuma balan zeme  
 mamkotne kotne inmagen kot patan zewap.  
<sup>6</sup> Neŋ Masedonia msalen kwesiŋ penaŋ ku mam-  
 bap, winde bemberak inmagen kobap. Inmagen  
 koti inmak belaknik bugan mambap ma inmak  
 ke tapmetnepema mawalam kanen delaŋ zewe

mene. Ma in set aikneme neŋ katim indemti butnaset ŋen mebap. <sup>7</sup> Neŋ inmak abatatat palen kotati mebegat ku nembein inmak ke Amobotnaŋaŋ nâmneme koti inmagen kan teepmaŋnik bugan mamayelen nâmti zeyap. <sup>8</sup> Neŋ pi ewe Epesa mkaen kapi mama Pentikos Kendo bewe. <sup>9</sup> Pienen Kawawaŋaŋ ikŋaŋgalen Zet Zapat Dolakŋaŋ Penan zenzeyelen set weyaŋneme mulup temaŋ penaŋ sokbemnain. Yangut keyet keŋan Kawawaŋgalen Zet Zapat Dolakŋaŋ Penan galen kasa kuku an notnaŋ tapmaip ekŋen neŋmak ŋeŋbeluŋ beluŋ mti mulupnnaŋgat kasa bugan tapmip.

<sup>10</sup> Timoti egaŋ inmagen koti kiŋgatpeŋ mam-beyet kopme ekti in wati mkitikpewep. Neŋ Amobotnaŋgalen mulup mamiyap egaŋ mulup keyegak mamin. <sup>11</sup> Keyepmti in egat nâme tototnaŋ ku bewe. Ek ekdamuŋ dolakŋaŋ mpemti peme ewe gilik zemti nenmagen keŋ sewakŋaŋ palen kobe. Neŋ ma am nâmkinaŋpepemak notnaŋ nin egat damuŋ tapmanup.

<sup>12</sup> Ningat notn Apolos ek inmagen am nâmkinaŋpepemak notnaŋ indatime inmagen kokogat zegiŋgiŋ mpema egaŋ nâme bugan nukŋaŋnik bein. Egaŋ kan kapigogat ku kobe bam maneti ikŋaŋ inmagen kokogalen nâmtiŋgut kopme ekbep.

<sup>13</sup> In nâmkinaŋpepeŋin mme toweweyelen nukŋaŋ sambe kobeyet eksemti tabep. Ma Kilais kogogak giŋgiŋ nâmkinaŋpemti mambeb. Am windetoŋ ekŋenaŋ nâmtalat matalipnok in kogogak nâmtalati mamambep. In mama mimi

bekanaŋ ñen nâmpeme keyaŋ ku indikdamuŋ mti tabe. <sup>14</sup> Kogok mti kwitnaŋ kwitnaŋ sambe gogot palen mbep.

<sup>15</sup> In Stepanesmak am egalen mkaen matalipgat yaŋaŋin nâip. Akaia msalen an ke ma am egalen mkaen matalip ekñaŋaŋ ñeñaŋ bemti Kawawaŋgalen Zet Zapat Dolakñaŋ Penañ nâmti nâmkijpepe aikbien. Ekñaŋaŋ dâpmeleŋgeyelen damuŋ mamti Kawawaŋgalen buŋam zapalaŋ palakñaŋ bembeyet mukulem eyo mamip. Kilaismagen notnne, in kapigok ewe mimiyelen zema nâit, <sup>16</sup> in ekñengat nâmindeme mopme an damuŋ sambe neŋ mamiap sepem kegogak mâti mamip ekñen eksemindewep. <sup>17</sup> Ingalen an damuŋ kapigogaŋ neŋmagen Epesa kobien Stepanesmak Potiunetas ma Akaikas ekñaŋaŋ kopme neŋ indikti oloŋen penañ mimindewan. Ekñaŋaŋ ingat munduminan koti ingat zet zapalin mname keyaŋ keŋŋ mkipmaŋ beye. <sup>18</sup> Dolakñaŋ penañ an ekñen kapi zemindeme kobiengapm nâgât keŋŋ ma ingat keŋin kogogak msewakñaŋ bewien. In an keboŋ ekñengat kegogak nâme dolakñaŋ bewe.

*Pâlaŋ amñaŋe indamukumindemti zemgwatnaŋ mimindein*

<sup>19</sup> Nâmkijpepemak am Esia msalen maip ekñaŋaŋ in indamukumindeip. Akwilamak Plisila ekñetgalen mkaen am nâmkijpepemak maondegip ma egelaŋ Amobotnaŋgat pembe-naŋgapm in gogot palen indamukumindeip. <sup>20</sup> Kilaismagen notnne neŋmak pien taliwaŋ indamukumindeip. Kawawaŋgalen Zet Zapat

Dolakŋaŋ Penanŋ mâti maip ilinak bet butem ainti oloŋen palen mambep.

<sup>21</sup> Pi neŋ Pâl inda mukukuyelen zet kapi betnnaŋ penanŋ meluwaŋ kumindayap.

<sup>22</sup> Am ŋenaŋ Amobotnaŋgat wisat mbe beme ek teziŋ ŋandenŋat zapat bewe. Amobotnaŋ, geŋ kot!

<sup>23</sup> Amobotnaŋ Zisas Kilaisiyelen keŋ taolet in-magen wemti weweyet mandunduyap.

<sup>24</sup> Neŋ Kilais Zisasmagen tusumtati in sambe nâmtikŋaŋ mimindeyap.

**Kawawangalen Tâtâ Alakŋaŋ**  
**The New Testament in the Nabak Language of Papua**  
**New Guinea**  
**Nupela Testamen long tokples Nabak long Niugini**

copyright © 1988 Wycliffe Bible Translators, Inc.

Language: Nabak

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

---

PDF generated using Haiola and XeLaTeX on 11 Nov 2022 from source files dated 9 Oct 2020

ea68a902-358a-5c72-82de-a583fc4809e7